

2 Samuel

Netudtulan si David he Minatey en si Saul

¹ Hein minatey en si Saul midlikù ensi David diyà te Ziklag te nezaag dan en dutun is menge Amalikanhen. Dezuwa he andew sikandan dutun te Ziklag. ² Iketelu he andew, zuen nekeuma zutun te Ziklag he etew he ebpuun diyà te kampu ni Saul, he nengevindas is kumbalè din, ne nepurung te eliyavuk is ulu zin su ibpeehè din he edlalew sikandin. Midhendiyà sikandin te ki David ne midluhud su edtahud kandin. ³ Mid-insaan sikandin ni David te, “Hendei ke ves ebpuun?” Midtavak sikandin te, “Mibpelaguy a puun te kampu te menge Israilihanen.” ⁴ Mid-insaan ni David te, “Maan, hengkey ves is neulaula? Tezemi a.” Migkagi sikandin te, “Nemelaguy en is menge sundaru te Israel dutun te tebek. Utew meza-kel kandan is nengepatey, apil en si Saul wey is anak din he si Jonatan.” ⁵ Mid-insà si David, “Maan is netuenan nu he minatey en si Saul wey si Jonatan?” ⁶ Midtavak haazà is menguhed pa he etew te, “Hein diyè e pa te Buntud he Gilboa, ne neehè ku si Saul zutun is nesendigan din dà is bangkew zin. Ne is menge kuntada zin ne mid-uvey en diyà te kandin is ed-untud te menge kerwahi wey menge kudà. ⁷ Kedlingi din ne neehè e zin ne mid-umew e zin. Midtavak a te, ‘Hengkey is igkeugup ku kenikew?’ ⁸ Mid-insaan e zin ke hentei a. Midtavak a te Amalikanhen a. ⁹ Ne migkegiyan e zin te, ‘Uvey ka kayi wey a himetayi

en, su henduen be te ibpatey ku en heini is palì ku.’
¹⁰ Ne mid-uvayan ku sikandin ne midhimetayan ku su netuenan ku he kenè en sikandin dutun egkeuyag te palì din. Ne migkuwa ku heini is kuruna te ulu zin wey rintì din, ne mid-uwit ku kayi te kenikew, datù.”

¹¹ Dutun mibindas ni David wey te langun he menge sakup din is menge kumbalè dan su ibpeehè dan is kedlalew zan. ¹² Nemeninegew zan wey mibpuasa taman te mezukilem su midrugur zan ki Saul, wey te anak din he si Jonatan, wey te nasyun he Israel, he menge etew te NENGAZEN, su utew mezakel kandan is nengepatey te tebek. ¹³ Ne mid-umanan insai ni David haazà is betanen he mibpenudtul kandin te, “Hendei ka ed-ubpà?” Midtavak sikandin te, “Amalikanhen a he ziyà med-ubpà te tanè niw he Israel.” ¹⁴ Mid-insaan ni David te, “Maan is wazè ka mahandek he edhimatey te hadi he pinilì te NENGAZEN?” ¹⁵⁻¹⁶ Migkegiyan ni David haazà is Amalikanhen te, “Iyan ke zà hinungdan te kemetayen nu. Iyan ka nenistigus te keugelingen nu he iyan ka iyan midhimatey te pinilì te NENGAZEN he hadi.” Ne migkegiyan ni David is sevaha te menge sakup din te, “Hengkayi ka, himetayi nu heini!” Ne zutun midhimetayan din.

Is Penhulùhulù ni David Bahin te Kedlelawi Zin ki Saul wey ki Jonatan

¹⁷ Migarey si David te penhulùhulù te kedlelawi zin ki Saul wey te anak din he si Jonatan, ¹⁸ ne insugù din he ibpenurù heini ziyà te menge meginged te Juda. Migngezanan heini te Kanta te

Kedlalew, ne insurat heini ziyà te libru ni Jashar.
Iyan heini penhulùhulù din:

19 “Menge Israilihanen, nemematey en is dunganen he menge pengulu ziyà te menge vuvungan te Israel.

Nemematey en daan is memevurut he sundaru niw!

20 Kenà heini tudtula ziyà te inged he Gat, minsan diyà te menge zalan te inged he Ashkelon, su kela ke ikelipey zà heini te menge vahi te menge Filistihanen he wazà mekekilala te Megbevayà.

21 Berakat he wazè en uzan wey ke zehemug be, ziyà te menge vuntud he Gilboa wey verakat daan he wazè en edtuvù he menge pinemula ziyà te menge vevesukà kayi para idhalad te Megbevayà.

Su kenian buringi te menge kuntada is kelasag te mevurut he hadi he si Saul.

Ne wazè en melenahi heini he kelasag para mebmetilak.

22 Pinaagi te ispada ni Saul wey te panà ni Jonatan, mezakel is nepatey zan he memevurut he menge kuntada zan.

23 Utew mibmahal te menge Israilihanen si Saul wey si Jonatan su nesuatan dan sikandan.

Wazè dan mekedsuwey taman te kemetayen dan. Diyà te tebek, henduen be te megaan pa sikandan te vanug wey mezesen dan pa te erimaung.

24 Sikiyu is menge vahi te Israel, rurun kew para ki Saul.

Su tenged kandin nekevivisti kew te mahal he visti wey menge elahas he vulawan.

²⁵ Nemematey en is menge memevurut he sundaru te Israel te tebek.

Minatey en si Jonatan diyà te menge vuvungan.

²⁶ Utew mesakit is gehinawa ku tenged kenikew, Jonatan, he suled ku!

Pelanggè ku utew sikew, su is kebmahala nu kedì, ne lavew pa te kebmahal nu te menge vahi.

²⁷ Nemematey en is memevurut he menge sundaru te Israel.

Is menge gumaan dan ne nengetazin en.”

2

Nehimu si David he Hadì te Juda

¹ Nepasad haazà, nenginginsà si David te NENGAZEN, “Edlikù e ve ziyà te sevaha he inged he sakup te Juda?” Midtavak is NENGAZEN te, “Uya.” Mid-insà si David te, “Hendei?” Midtavak is NENGAZEN te, “Diyà te Hebron.” ² Dutun migenat si David дума is dezuwa he esawa zin he si Ahinoam he tig-Jezreel wey si Abigail he esawa zengan ni Nabal he tig-Carmel. ³ Miduma ni David is menge sakup din apil is pemilya zan, ne ziyè dan med-ubpà te Hebron wey ziyà te menge lugar he nengekelingut kayi. ⁴ Hein nepiraan en sikandan dutun, midhendiyà te Hebron is menge pengulu te Juda ne midlenahan dan is ulu ni David he tuus te iyan en sikandin nehimu he hadì te Juda.

Hein netuenan ni David he is menge tig-Jabesh Gilead iyan midleveng ki Saul, ⁵ midsugù sikandin diyà te ibpepenudtul ziyà te kandan he egkagi te, “Berakat he tuvazi kew te NENGAZEN te impeehè niw he zekelà is kedmahal niw ki Saul te egalen niw pinaagi te kedlevenga niw kandin. ⁶ Berakat

he ipaahà te NENGAZEN is gagew zin wey kebmet-inumanen din diyà te keniyu, ne ibpeehè ku zaan is kebpurungi ku keniyu tenged te mibeelan niw. ⁷ Ne guntaan, pekelig-en kew wey pekevurut kew minsan te minatey en si Saul he egalen niw. Iyan a mibpili te menge tig-Juda he iyan hadi dan.”

Midtebek is Pemilya ni David wey ni Saul

⁸ Dutun he timpu, is peremandar te menge sundaru ni Saul he si Abner he anak ni Ner midhendiyà te Mahanaim. Miduma zin si Ishboshet he anak ni Saul. ⁹ Dutun impahayag ni Abner he iyan si Ishboshet hadi te tivuuk he Israel, ragkes en kayi is menge lugar ziyà te Gilead, Ashuri, Jezreel, Efraim, wey Benjamin. ¹⁰ Ne 40 he tuig is kegurang ni Ishboshet hein nehimu sikandin he hadi te Israel, ne midhadì sikandin seled te zezuwa he tuig. Is menge tig-Juda mulà, si David is migkilala zan he hadi dan, ¹¹ ne midhadì dutun si David seled te pitu he tuig wey heenem he vulan. Diyà sikandin med-ubpà te Hebron.

¹² Sevaha zutun he andew, midhendiyà si Abner te Gibeon is ebpuun diyà te Mahanaim he zuma zin is menge sakup ni Ishboshet. ¹³ Midsinugung sikandan ni Joab he anak ni Zeruya wey te menge sakup ni David diyà te peneng te Gibeon. Nememinuu is grupu ni Abner ziyà te zivaluy he vahin dutun te peneng ne nememinuu zaan diyà te zivaluy zaan he vahin is grupu ni Joab. ¹⁴ Ne migkegiyan ni Abner si Joab te, “Ibpedtebek ta is duma he menge ventugan he sundaru ta kayi te etuvangan ta.” Midtavak si Joab te, “Uya!” ¹⁵ Dutun midhitindeg is 12 he menge sakup ni

Ishboshet he ebpuun te tribu ni Benjamin para ebpekidtebek wey is 12 zaan he sakup ni David. ¹⁶ Midhitindeg dan ne mibpegewgewezè dan diyà te ulu ne mibpezungdunggavey zan taman te naamin dan mebpematey. Umbe iyan ngazan dutun he lugar te Gibeon is Helkat Hazurim. ¹⁷ Ne zutun mibpurung medtebek haazà is dezuwa he grupu. Te haazà he andew nezaag si Abner wey is menge sakup te Israel te menge sakup ni David.

¹⁸⁻¹⁹ Ne zutun, is tetelu he anak ni Zeruya he si Joab, Abishai, wey si Asahel nekezuma te tebek. Si Asahel utew megaan he ebpelelaguy he henduen te selazeng, ne midal-as din si Abner he wazà kedlilingey. ²⁰ Hein kedlilingey ni Abner, neehè din sikandin ne mid-insaan din te, “Sikew ve heeyan Asahel?” Midtavak si Asahel te, “Uya.” ²¹ Ne migkegiyan ni Abner sikandin te, “Kenè e en kenikew leyasa, iyan nu en leyasa haazà is duma ku he sundaru, ne egawa nu is menge gumaan din.” Piru wazà mebpemineg si Asahel.

²² Mid-uman mekgagi si Abner ki Asahel te, “Engkezi ad kenikew te edlayas! Kenà a kenikew pegesa te kedhimatey kenikew. Egkeeled a he ebpekid-etuvang te suled nu he si Joab emun egkepatey ku sikew.” ²³ Piru wazà iyan engkezi ni Asahel te edal-as si Abner, umbe mibpilak din te vangkew zin diyà te getek, ne midlambas diyà te peka zin. Nepiley sikandin ne segugunà mibpatey. Is menge etew he ebpekevayà dutun he lugar te nepetayan ki Asahel ne edteren.

²⁴ Hein netuenan ni Joab wey ni Abishai is neulaula, midal-as dan si Abner. Hein midsanlep en is andew, nekeuma zan diyà te vuntud te Ama uvey

te Gia, he ziyà te kilid te zalan he ibpehendiyà te sibsivayan te Gibeon. ²⁵ Impaamur-amur ni Abner ziyà te puntur te menge vuvungan is menge sundaru he ebpuun te tribu ni Benjamin para ed-andam te kebpekidtebek. ²⁶ Migkulahì ni Abner si Joab te, “Pedayun en be is kebpehimhimetayè tew? Wazè nu ve meisip-isip he is pangkus kayi iyan is kepezumdumutà? Maan is kenè nu egkezaway is menge sakup nu he edal-as kenami te menge kezuzumahi niw?”

²⁷ Midtavak si Joab te, “Emun wazè ka megkagi, ibpesarig ku kenikew, kayi te etuvangan te uuyag he Megbevayà, ne edel-asen ka pezem te menge sakup ku taman te egkepawà.” ²⁸ Ne impezaging ni Joab is budyung ne midteren is langun he menge sakup din he edal-as te menge tig-Israel. Ne zutun neengked is tebek. ²⁹ Dutun tivuuk he mezukilem is kedhipanew ni Abner wey is menge sakup din dutun te Araba. Ne midrapas dan dutun te Wahig he Jordan, ne midlaus dan he edhipanew taman te meselem taman te nekeuma zan diyà te Mahanaim.

³⁰ Dutun te ked-engkezi ni Joab te kedal-as ki Abner, ne mid-uli sikandin duma is menge sakup din. Hein netigum dan en ne netuenan din he 19 is nepatey te sakup ni David gawas ki Asahel. ³¹ Piru is nepatey he sakup ni Abner ne 360, diyà heini ebpuun te tribu ni Benjamin. ³² Migkuwa eni Joab is minatey he lawa ni Asahel ne inleveng diyà te midlevengan te amey zin diyà te Betlehem. Ne zutun tivuuk he mezukilem is kedhipanew zan, ne nekeuma sikandan diyà te Hebron.

3

¹ Iyan haazà puunà te melugayad he tebek te edapig ki Saul wey te edapig ki David. Ed-iseg ebmelig-en is grupu ni David ne ebmeluya mulà is grupu ni Saul.

² Iyan heini menge anak ni David he neetew ziyà te Hebron. Is kinekekayan iyan si Amnon he anak din diyà te ki Ahinoam he tig-Jezreel. ³ Is ikezuwa iyan si Kileab he anak din diyà te ki Abigail te esawa zengan ni Nabal he tig-Carmel. Is iketelu iyan si Absalom he anak din diyà te ki Maaca he anak ni Hadì Talmai ziyè te Geshur. ⁴ Is ikeepat iyan si Adonia he anak din diyà te ki Hagit. Is ikelima iyan si Shefatia he anak din diyà te ki Abital. ⁵ Ne is ikeenem iyan si Istream he anak din diyà te ki Eglà. Iyan sikandan impen-anak diyà te Hebron he menge anak ni David.

Mid-amur si Abner ki David

⁶ Dutun te kemulu pa is tebek te midapig ki David wey midapig ki Saul, si Abner is melig-en he pengulu te midapig ki Saul. ⁷ Ne sevaha he andew, migkegiyan ni Ishboshet si Abner te, “Maan is midhulizan nu is sevaha he esawa te amey ku he si Saul?” Is bahi he ibpesavut ni Ishboshet iyan si Rizpa he anak ni Aya. ⁸ Uteu nepauk si Abner zutun te migkagi kandin ni Ishboshet, ne midtavak sikandin te, “Kunaan nu vuwa ke edluivan ku en is amey nu, ne ziyà a edapig te Juda? Puun pa zengan mid-unungan ku is amey nu wey is pemilya zin wey menge emigu zin, ne wazè ku ivegey ki David. Guntaan edhelezan a kenikew he nekesalà a keniyàn te vahi! ⁹ Emun iyan heeyan,

ne deyzey pa ke ed-ugupan ku si David he metuman is saad kandin te NENGAZEN, ne verakat he siluti a te Megbevayà emun ke kenè ku sikandin edtevangan. ¹⁰ Midsaad is NENGAZEN he kenè din en ibpahadì is minsan hentei he kevuwazan ni Saul, kekenà, si David en is edhimuwen din he hadì te Israel wey Juda, puun te Dan taman te Beersheba.” ¹¹ Wazè en medtavak si Ishboshet su nahandek sikandin ki Abner.

¹² Ne midsugù si Abner te minge etew he ebpekegiyan si David te, “Sikew is engayan he edhadì te tivuuk he tanà te Israel. Baal ka te ke-sebutan ta, ne edtevangan ku sikew he mesakup nu is tivuuk he nasyun te Israel.” ¹³ Midtavak si David te, “Uya, ebaal a te kesebutan ta, asal duen ku zaan hangyù kenikew: emun edlikù ka kayi te kedì ne uwita nu is esawa ku he si Mical he anak ni Saul.”

¹⁴ Midsugù si David te etew he ibpepenudtul ziyà te ki Ishboshet te, “Ilikù nu kayi te kedì is esawa ku he si Mical. Su 100 he Filistihanen is midhimetayan ku ne migkuwa ku is lundis te purù te sineruwan dan he iyan sunggud ku te ked-esewaa ku ki Mical.” ¹⁵ Umbe, midsugù si Ishboshet he ibpekuwa si Mical ziyà te ne-keesawa kandin he si Paltiel he anak ni Laish. ¹⁶ Ne si Paltiel, midtinundug sikandin ki Mical he edsinegew taman te Bahurim. Migkegiyan ni Abner si Paltiel he med-uli en. Ne mid-uli en daan sikandin.

¹⁷ Mibpekidsebutà si Abner wey minge sinerigan te Israel. Migkagi sikandin te, “Neuget en he egkesuat kew he iyan egkehimu he hadì si David. ¹⁸ Guntaan, egkehimu tew en su midsaad

is NENGAZEN he pinaagi te suluguen din he si David, edlibriyen din is keet-etawan din he menge Israilihanen su wey kenè en sikandan egkeveyveyaan te menge kuntada zan wey te menge Filistihanen.”¹⁹ Mibpekidlalag daan si Abner te tribu ni Benjamin. Ne midhendiyà sikandin te Hebron te kepenudtul ki David he ed-uyun is menge etew te Israel wey te Benjamin he iyan en hadi dan sikandin.

²⁰ Hein nekeuma si Abner ziyà te Hebron duma is 20 he menge sakup din, migastu si David para kandan. ²¹ Migkegiyan ni Abner si David te, “Mahal he Hadi, peminega a kenikew su edhipanew a guntaan su egkegiyan ku is langun he etew te Israel he med-uyun dan he iyan ka hadi dan. Ibpevaal ku sikandan te kесеbutan he edewaten ke zan he hadi dan. Ne pudu nu en egkehedi is egkesuatan nu he edhedian.” Umbe impegenat ni David si Abner he wazè din menuwa.

Midhimetayan ni Joab si Abner

²² Nekeuma si Joab wey is duma he menge sakup ni David diyà te Hebron he ebpuun te kebpengayew, ne utew zekelà is neuwit dan he naagew zan. Piru wazè en diyà si Abner su impegenat en ni David he wazè din menuwa. ²³ Hein netuenan ni Joab he midhendiyà si Abner te hadi he wazà menuwa, ²⁴ midhendiyà si Joab te hadi he egkagi te, “Hengkey ves is baal nu? Midhengkayi en si Abner, maan is impegenat nu pa? Ne, guntaan wazè en sikandin! ²⁵ Nekilala nu en si Abner. Midhendini sikandin su edlimbungan ke zin, wey ebpeniizan din is langun he ebeelan nu.” ²⁶ Midawà si Joab dutun te ki David ne midsugù he

ibpezal-as si Abner. Neseutan dan si Abner ziyà te teheb he Sira ne miduma zan wey mekelikù diyà te Hebron. Piru wazà heini metueni ni David. ²⁷ Hein diyè en si Abner te Hebron, miduma sikandin ni Joab diyà te pultahan te inged he iyan dan dà is dezuwa. Mid-ekalan din te zuen dan kun edlelagen. Hein nekeuma zan dutun midunggab ni Joab si Abner ziyà te getek su impenimales din is kedhimetayi ni Abner ki Asahel te suled din. Ne minatey si Abner.

²⁸ Hein netueanan haazà ni David, ke sikandin te, “Nesayud is NENGAZEN he siak wey is menge sakup ku ne wazà keseyuzan te kemetayen ni Abner he anak ni Ner. ²⁹ Si Joab wey is pemilya zin iyan duen din televaken. Deyzey pezem ke is pemilya zin ne letuni te zaru he ebpenggewasan te meremerik is sudiyè dan, duen daru te lundis, mengehimu he inutil wey mebpematey te tebek wey layun bitila.” ³⁰ (Iyan hinungdan te kedhimetayi ni Joab wey ni Abishai he suled din ki Abner su midhimetayan daan ni Abner is suled dan he si Asahel hein kedtebek diyà te Gibeon.)

³¹ Dutun migkegiyan ni David si Joab wey kes langun he menge zuma zin te, “Bindasa niw is menge kumbalè niw, wey iyan niw ikukumbalà is saku. Ne ilalew niw si Abner zutun te edhipanew kew ziyà te egkehunaan te minatey he lawa ni Abner zutun te kedlevenga kandin.” Miduma si Hadì David te kedleveng. ³² Diyà ileveng si Abner te Hebron; midsinegew si Hadì David dutun te kedleveng. Midsinegew is langun dutun he miduma te kedleveng. ³³ Migkanta si Hadì David kayi he penhulùhulù para ki Abner:

“Maan is minatey si Abner he iring te sevaha he selaan?

³⁴ Wazà bekusa is menge velad wey menge paa zin; midhimetayan sikandin te lalung he menge etew.”

Midsinegew en maan is langun he menge etew tenged ki Abner. ³⁵ Wazà megkaan si David dutun he andew, ne midtegel sikandin te menge etew he ibpekaan. Piru midsesapà si David he egkagi te, “Berakat he purungi a siluti te Megbevayà ke egkaan a te minsan hengkey te kenè pa edsanlep is andew.” ³⁶ Utew nengelipey is menge etew zutun te migkagi ni David, wey kenà iyan dà ingkelipey zan haazà, kekenà, elin daan is langun he mibee-lan ni David. ³⁷ Umbe, netuenan human te menge etew te Israel he si Hadì David wazè din kelevetan te kemetayan ni Abner.

³⁸ Ne migkegiyan ni David is menge sakup din te, “Wazè niw ve mesavut he is minatey guntaan he andew sevaha he ventugan he egalen te Israel?

³⁹ Ne minsan iyan a mibpili he hadì guntaan, kenè ku egkeveyveyaan si Joab wey si Abishai, he menge anak ni Zeruya. Neregenan a utew kandan. Umbe, iyan en is NENGAZEN ebales te lalung he menge etew te kelelalung he menge vaal zan.”

4

Midhimetayan si Ishboshet

¹ Hein netuenan ni Ishboshet, he anak ni Saul, he midhimetayan si Abner ziyà te Hebron, utew nahandek sikandin wey is langun he tig-Israel.

² Duen dezuwa he sakup ni Ishboshet he iyan mibpengulu te kedsurung diyà te inged te menge

kuntada zan. Si Baana wey si Recab. Menge anak sikandan ni Rimon he tig-Beerot, he ebpuun te tribu ni Benjamin. Heini is Beerot sakup te Benjamin, ³ su is nehuna he mid-ubpà kayi ne mibpemelaguy zan diyà te Gitaim, ne taman guntaan dutun dan en he meginged te kenà kandan he tanà.

⁴ Gawas ki Ishboshet duen pa kevuwazan ni Saul he nesamà he iyan si Mefiboshet, he anak ni Jonatan. Lelime en he tuig is penuigen din te kebpatay ni Saul wey si Jonatan diyà te Jezreel. Hein netueanan duen te egahat ki Mefiboshet he minatey en si Saul wey si Jonatan, migègaanan din enawa sikandin ne mibpelaguy. Dutun te utew zin kegkezegusu he ebpelaguy, nelekaan din haazà is batà umbe nehimu he begelid heini.

⁵ Ne sevaha he andew, midhendiyà te valey ni Ishboshet si Recab wey si Baanah he munge anak ni Rimon he tig-Beerot. Neudtu zutun is andew te kebpekeuma zan; si Ishboshet ne ebperenggey. ⁶⁻⁷ Ne midseled dan su uvag kun egkuwa zan te trigu. Ne midseled sikandan diyà te rugu ni Ishboshet ne zutun sikandin te katri zin edhidhizegà ne segugunè dan dunggava ziyà te getek. Ne midtamped dan is lieg din ne migkuwa zan is ulu ne mid-uwit dan te ebpelaguy ne ziyè dan mebaya te Araba te tivuuk he mezukilem.

⁸ Hein nekeuma zan diyà te Hebron, mid-uwit dan is ulu ni Ishboshet diyà te ki David he ke sikandan te, “Heini en is ulu ni Ishboshet he anak duen te kuntada nu he si Saul he edhimatey pezem kenikew. Iyan is NENGAZEN mibales diyà te ki Saul guntaan wey ziyà te munge kevuwazan

din para kenikew.” ⁹ Midtavak ni David sikan-dan te, “Egkegiyen ku keniyu is tutuu kayi te etuvangan te uuyag he NENGAZEN he iyan midluwas kedì te langun he ebpekekaid. ¹⁰ Duen etew he midhendiyà te kedì diyà te Ziklag he nenud-tul te minatey si Saul. Mid-isip din he igkesuat ku is kedtutuli zin kedì. Piru impezakep ku sikandin ne midhimetayan ku. Iyan haazà suhul ku kandin te tudtul zin kedì. ¹¹ Guntaan, sikiyu is menge mezaat is menge ulaula edsilutan ku sikiyu te subra pa kayi, su midhimetayan niw is etew he wazè din salà, he ziyè dà edhidhizegà te keugelingen din he valey zutun te hizegeey zin. Ebpeveyazan ku heini keniyu is kedhimetayi niw kandin para mahanew kew zaan kayi te kelibutan.”

¹² Umbe, mibmenduan ni David is menge sakup din he ibpehimetayan si Recab wey si Baana. Ne midtuman dan haazà. Midpenamped is menge velad wey is menge paa zan ne imbitey is lawa zan diyà te peneng diyà te Hebron. Migkuwa zan is ulu ni Ishboshet ne inleveng dan diyà te midlevengan ki Abner ziyà te Hebron.

5

Nehimu si David he Hadì te Israel (1 Cronica 11:1-9)

¹ Midhendiyà is langun he tribu te Israel te ki David diyà te Hebron he egkagi te, “Menge kezuzumahi key kenikew. ² Puun pa zengan, minsan te iyan pa si Saul hadì dey, ne iyan ke pa nengulu te menge Israilihanen te kebpekidtebek. Ne migkegiyan ka te NENGAZEN te, ‘Elimahi nu is

menge etew ku he Israilihanen te iring te ked-
elima te ebantey te menge kerehidu. Iyan ka
egkehimu he pengulu zan.’ ”

³ Umbe, ziyà te Hebron, mibaal si David te
kebpekid-uyun te menge pengulu te Israel ziyà
te etuvangan te NENGAZEN, ne midlenahan dan
is ulu ni David te lana he ibpeehè dan he iyan
en sikandin hadi te Israel. ⁴ Ne 30 he tuig is
kegurang ni David hein nehimu sikandin he hadi,
ne midhadi sikandin seled te 40 he tuig. ⁵ Pitu he
tuig wey heenem he vulan is kedhadi din diyà te
Juda hein diyè pa med-ubpà sikandin te Hebron,
ne 33 he tuig is kedhadi din te tivuuk he Israel wey
Juda hein diyà sikandin med-ubpà te Jerusalem.

Is Kegkegawa ni David te Jerusalem

⁶ Duen timpu he migenat si David wey is menge
sakup din pehendiyà te Jerusalem su edsurungen
dan is menge Jebusihanen he meginged dutun.
Migkagi is menge Jebusihanen diyà te ki David
te, “Kenè kew ebpekeseled kayi te Jerusalem!
Minsan is menge lakap wey menge pigket ne
ebpekepugung keniyu te edseled.” Iyan haazà
kinegiyan dan, su neisip dan he kenà iyan ebpeke-
seled ensi David. ⁷ Piru naagew ni David is melig-
en he kutà te Zion, he eggezanan guntaan te
Inged ni David.

⁸ Hein wazè pa meselezi ni David is Jerusalem,
ne migkegiyan din is menge sakup din te, “Diyè
kew vayà te ebeyaan te wahig para mekeseled
kew ziyà te Jerusalem, ne egkezaag niw is menge
Jebusihanen he iring te menge pigket wey menge
lakap. Utew ku en sikandan kuntada!” Iyan

heini erubasa he nehimu tenged dutun, “Kenà ebpekeseled is lakap wey pigket dutun te valey te NENGAZEN.”

⁹ Hein naagew en ni David haazà is Zion, diyè en sikandin med-ubpà, ne migngezanan din haazà te Inged ni David. Ne mibpeumanan din haazà pepelinguti te verengbeng puun te mevavà he vahin dutun te inged. ¹⁰ Utew mibmelig-en si David, tenged te edtevangan sikandin te NENGAZEN he Megbevayà he Mekegegehém.

¹¹ Dutun he timpu, midsugù si Hadì Hiram he hadì te Tyre te menge menunudtulà diyà te ki David дума is menge pandey, menge tigsimintu, wey mibpeuwit te menge kayu he sidru, su eben-gunen dan is turugan ni David. ¹² Ne zutun nesavut ni David he iyan is NENGAZEN midsavuk kandin he hadì te Israel wey iyan mibpeuswag te ginhedian din para te menge etew zin he menge Israilihanen.

¹³ Hein midhalin si David diyà te Jerusalem is ebpuun diyà te Hebron, mahabet pa is mid-esawa zin; is дума he mid-esawa zin ne kenà lavew is ked-etew, ne neumanan is menge anak din.

¹⁴ Iyan heini ngazan te menge anak din he maama he neetew ziyà te Jerusalem: Shamua, Shobab, Natan, Solomon, ¹⁵ Ibhar, Elishua, Nefeg, Jafia, ¹⁶ Elishama, Eliada, wey si Elifelet.

*Nezaag ni David is menge Filistihanen
(1 Cronica 14:8-17)*

¹⁷ Hein netueanan te menge Filistihanen he iyan si David nepilì he hadì te Israel, midtigum dan is langun he menge sundaru zan para te kedakep

kandin. Piru netuenan ni David, umbe mid-hendiyà sikandin te sevaha he melig-en he kutà. ¹⁸ Dutun, migkampu is menge Filistihanen diyà te menge Sugud he Refaim. ¹⁹ Umbe, nenginginsà si David te NENGAZEN, “Edsurungen dey ve is menge Filistihanen? Ibpezaag nu ve sikandan kenami?” Midtavak is NENGAZEN diyà te kandin, “Uya, genat kew en, su ibpezaag ku sikandan keniyu.”

²⁰ Ne nemenggenat ensi David pehendiyà te Baal Perazim, ne zutun nezaag dan is menge Filistihanen. Migkagi si David te, “Migerà te NENGAZEN is menge kuntada ku he henduen be te mibeyaan te zekelà he zalem, ne utew ku heini nemetmetahi.” Umbe migngezanan haazà he lugar he Baal Perazim. ²¹ Ne mid-ewaan te menge Filistihanen is menge ed-ezapen dan dutun, ne mibpen-uwit ni David wey te menge sakup din.

²² Midlikuan te menge Filistihanen haazà is Sugud he Refaim ne migkampu zan dutun. ²³ Ne mid-uman mebpenginginsà si David diyà te NENGAZEN, ne midtavak is NENGAZEN te, “Kenè niw gègaani te edsurung, kekenà, linguti niw sikandan ne surunga niw ziyà te uvey te menge kayu he balsam. ²⁴ Emun egkezineg niw he henduen te ebmartsa is menge sundaru ziyà te zapit te zivavew zutun te menge kayu he balsam, ne surunga niw en su iyan tuus heeyan he iyan a edhuna te kedsurung niw te menge Filistihanen.” ²⁵ Umbe, midtuman ni David is insugù kandin te NENGAZEN, ne nengepatey zan is menge Filistihanen puun te Geba taman te Gezer.

6

Mid-uwit diyà te Jerusalem kes Kavan te Kebpekid-uyun

(1 Cronica 13:1-14; 15:25–16:6, 43)

¹ Midtigum umana ni David is egkeserigan he minge sundaru te Israel, 30,000 is kezakel zan. ² Ne migenat dan pehendiyà te Baala he sakup te Juda su egkuwaan dan diyà kes Kavan te Kebpekid-uyun te Megbevayà, he zutun is NENGAZEN he Mekegegehém. Ne zutun is NENGAZEN te teliwazà te minge kirubin he zutun te divavew te Kavan. ³⁻⁴ Heini he Kavan te Kebpekid-uyun te Megbevayà ne ziyà te valey ni Abinadab he ziyà te vuntud. Migkuwa heini eni David, ne in-untud dan te vegu he kerwahi. Si Uza wey si Ahio is minge anak ni Abinadab ne iyan migiya zutun te kerwahi; si Ahio ne iyan edhuna. ⁵ Midsilibra si David wey is langun he etew te Israel ziyà te etuvangan te NENGAZEN te tivuuk dan he zesen. Nemenganta zan wey midtukar te minge alpa, lira, tamburin, kastanitas, wey simbal.

⁶ Hein nekeuma zan duen te gunasà ni Nacon, migewezan ni Uza haazà is Kavan te Kebpekid-uyun te Megbevayà, su nekezulas is minge vaka. ⁷ Uteu nepauk dutun is NENGAZEN ki Uza tenged te neveelan din. Umbe, midhimetayan sikandin te Megbevayà dutun dà te zurug te Kavan. ⁸ Nepauk si David su midsilutan te NENGAZEN si Uza tenged te kegkepauk din. Umbe taman guntaan ne iyan inngazan dutun he lugar is Perez Uza. ⁹ Nahandek si David te NENGAZEN te haazà he andew, ne nekekagi sikandin te, “Ebmenmenuwen en be he

meuwit heini is Kavan te NENGAZEN diyà te inged ku?” ¹⁰ Ne zutun neisip din he kenè din en ed-uwiten diyà te inged din haazà is Kavan te NENGAZEN. Diyè din itagak haazà te valey ni Obed Edom he tig-Gat. ¹¹ Diyà heini te valey ni Obed Edom itagù seled te tetelu he vulan, ne midtuvazan te NENGAZEN si Obed Edom wey is tivuuk he pemilya zin.

¹² Netudtulan si Hadì David he midtuvazan te NENGAZEN is pemilya ni Obed Edom wey is langun he gaked din tenged dutun te Kavan te Kebpekid-uyun te Megbevayà. Ne zutun midhendiyà si David te valey ni Obed Edom ne migkuwa zin haazà is Kavan te Kebpekid-uyun te Megbevayà su ed-uwiten din diyà te inged din дума is ke-lipey. ¹³ Hein keheenem en mekelangkad haazà is mid-uwit dutun te Kavan te NENGAZEN, impeteren sikandan ni David su nemuhat sikandin te sevaha he tudu he vaka wey sevaha he impelambù he turiti he vaka. ¹⁴ Midsayew si David diyà te etuvangan te NENGAZEN pinaagi te tivuuk he zesen din, he migkukumbalà te ipud he linu. ¹⁵ Dutun te kedhipanew te menge etew te Israel he ed-uwit te Kavan te NENGAZEN, ebpemengulahì dan is ebpezaging te menge vudyung.

¹⁶ Hein idseled dan en haazà is Kavan te NENGAZEN dutun te Inged ni David, mibpantew si Mical he anak ni Saul ziyà te bintanà. Ne neehè din si Hadì David is edlinglingketew en is edsayew ziyà te etuvangan te NENGAZEN, ne neepes si Mical te mibeelan ni David. ¹⁷ Insavuk eni David haaza is Kavan te NENGAZEN dutun te seled te tulda he mibeelan ni David he edsevukan

din dutun te Kavan. Ne nemuhat si David diyà te NENGAZEN te menge pemuhat he edtutungen wey menge pemuhat he para te meupiya he kedepità. ¹⁸ Hein nekepasad en sikandin he ebpemuhat, ne mibpenubtuvazan din is menge etew pinaagi te ngazan te NENGAZEN he Mekegegehem. ¹⁹ Ne is kada sevaha he Israilihanen, maama wey vahi, ne mibegayan din te supas, usa, wey menge pasas. Ne zutun nemen-uli is menge etew ziyà te valey zan. ²⁰ Ne mid-uli daan si David su ebpenubtuvazan din is tivuuk he pemilya zin, ne midtelavuk sikandin ni Mical he anak ni Saul, ne migkegiyan din te, “Henduen te hentei he telehuzen is hadi te Israel guntaan he andew! Midsayew sikandin he samè dà kenà medlelewas dutun te etuvangan te menge suluguen he menge vahi te menge up-isyal zin. Baal zà heeyan te wazè din keelezan.” ²¹ Migkegiyan ni David si Mical te, “Mibeelan ku haazà diyà te etuvangan te NENGAZEN he iyan mibpilì kedì he ilis te amey nu wey te minsan hentei he ziyà te pemilya zin. Mibpilì e zin he iyan edumala te keet-etawan din he menge Israilihanen. Umbe wazà ebpekevelavag te kedsilibra ku ziyà te etuvangan te NENGAZEN, ²² ne subra pa is ebeelan ku he mekeeled-eled. Igkeeled nu is ebeelan ku, piru ebentugen a mulà te menge vahi he egkegiyen nu he menge suluguen.” ²³ Ne wazè en med-anak si Mical taman te keb-patey zin.

7

*Is Saad te Megbevayà ki David
(1 Cronica 17:1-15)*

¹ Diyè en si Hadì David med-ubpà te turugan din, ne mibegayan te NENGAZEN te kelinew is ginhedian din, he wazè en igkaandam he edsurung. ² Ne sevaha he andew, migkegiyan ni David is ebpeneuven he si Natan te, “Kayi e en guntaan med-ubpà te utew mekempet he ubpeey he is menge pengawid din, ne ebpuun te kayu he sidru, piru haazà is Kavan te Kebpekid-uyun te Megbevayà ne zutun dà te tulda.” ³ Midtavak si Natan dutun te hadì te, “Beeli nu is egkesuatan nu te ebaal, su is NENGAZEN eduma kenikew.” ⁴ Piru te haazà he kezukileman mibpekidlalag is NENGAZEN ki Natan te, ⁵ “Genat ka, ne kegiyi is suluguen ku he si David he iyan heini migkagi ku: ‘Iyan ke ves ebpehitindeg te valey he ed-ubpaan ku? ⁶ Wazè e pa mekeubpà te valey he zutun a ed-ezapa is Megbevayà puun pa te timpu te kebpegewasa ku te menge Israilihanen puun te Ehipto taman guntaan. Nekehalinhalin ad is diyà ed-ubpà te tulda. ⁷ Hein kedhalinhalin ku he zuma ku is menge etew ku he Israilihanen, wazà ad megkagi ziyà te menge pengulu, he midsugù ku te ked-elima kandan, te maan is wazè e zan tukuzi te utew mekempet he valey he zutun a ed-ezapa he sidru is menge pengawid din.’

⁸ “Kegiyi nu pa si David he iyan a, is NENGAZEN he Mekegegehem, egkagi te, ‘Mibantey ke zà denggan te menge kerehidu, piru mibpilà ku sikew he edumala te menge etew ku he Israilihanen. ⁹ Midumahan ku sikew minsan hendei ka mebpevayà, ne impezaag ku kenikew is langun he kuntada nu. Guntaan edhimuwen ku sikew he mevantug iring te zuma he menge etew he egke-

vantug diyan te tivuuk he kelibutan. ¹⁰ Mibegayan ku en is menge etew ku he Israilihanen te ubpeey he pirmeninti, para zuen dan en keugelingen he ubpeey he wazè en ebpekesamuk kandan wey ebpekezaagdaag iring duen te nehuna, ¹¹ puun pa te timpu te kedsevuki ku te menge pengulu te menge etew ku he Israilihanen. Ebegayan ku te kelinew is ginhedian nu, ne wazè en kuntada he ebpekeseled dutun. Iyan a, is NENGAZEN, migkagi kenikew he iyan edhadì layun is sevaha te menge kevuwazan nu. ¹² Emun ebpatay kad ne idleveng ka zuma te menge kepuun nu, ibpuli ku kenikew is sevaha te menge anak nu, ne edlig-enan ku is ginhedian din. ¹³ Iyan sikandin ebangun te valey para te kebegay kedi te zengeg, wey edsig-ureduwen ku he is menge kevuwazan din ebpekahadì taman te taman. ¹⁴ Egkehimu he iyan a amey zin, ne iyan daan sikandin anak ku. Emun ebpekesalà sikandin, ne ebmensuwen ku sikandin iring te kebmansu te amey te anak din. ¹⁵ Piru kenà egkaawà is kebmahala ku kandin, kenà iring te mid-ulaula ku ki Saul he nepuliyen nu he hadì. ¹⁶ Ebpedayun te wazè pidtemanan is kenikew he ginhedian, ne is menge kevuwazan nu taman te taman is kedhadì dan.’ ” ¹⁷ Midtudtul ni Natan ki David is langun he impezayag te Megbevayà diyà te kandin.

*Is menge Pengemuyù ni David
(1 Cronica 17:16-27)*

¹⁸ Dutun midseled si Hadì David dutun te Tulda he zutun kes Kavan te Kebpekid-uyun. Ne mibpinuu sikandin diyà te etuvangan te NENGAZEN ne mibpengemuyù te, “He Nengazen

he MEGBEVAYÀ, hentei e ves wey is pemilya ku maan is midtuvazan a kenikew te iring kayi? ¹⁹ Ne guntaan, Nengazen he MEGBEVAYÀ, duen pa pe-naad nu mehitenged te egkepaabut te pemilya ku. Iyan be heini kes neleyaman en he ebeelan nu te etew? ²⁰ Hengkey pe be is egkekagi ku kenikew, Nengazen he MEGBEVAYÀ? Su netuenan nu en man ke hentei a is suluguen nu. ²¹ Tenged te insaad nu wey egkesuatan nu, mibeelan nu heini is dekelà he menge vaal wey mibpetuanan nu heini kediey te suluguen nu.

²² “Nengazen he MEGBEVAYÀ, utew ka iyan gemhanan! Wazà iyan ebpekerepeng kenikew wey wazè en minsan hentei pa he Megbevayà gawas kenikew. Wazè dey nezing he megbevayà he iring kenikew. ²³ Wey wazè en daan menge etew he iring te keet-etawan nu he menge Israilihanen. Iyan dà heini nasyun kayi te kelibutan he midluwas nu te kegkeuripen wey mehimu he keet-etawan nu. Nehimu ka he ventugan tenged te gehem nu wey egkein-inuwan he menge vaal nu hein midsegseg nu is menge etew ziyà te menge nasyun wey is menge ed-ezapen dan pinaagi te menge keet-etawan nu he midluwas nu puun te Ehipto. ²⁴ Midhimu nu is menge Israilihanen he keet-etawan nu te wazà pidtemanan, wey iyan ka, NENGAZEN he Megbevayè dan.

²⁵⁻²⁶ “Ne guntaan, NENGAZEN he Megbevayà, tumaana nu is menge saad nu kedì te suluguen nu wey te pemilya ku, para iyan ka mevantug te wazà pidtemanan. Ne egkagi is menge etew te, ‘Is NENGAZEN he Mekegegehèm iyan Megbe-

vayà te Israel!’ Ne is kedhadì te pemilya ku ebpedayun taman te taman. ²⁷ NENGAZEN he Mekegegehem, Megbevayà te Israel, zuen ku kevrut te kebpengemuyù kayi ziyà te kenikew tenged te impahayag nu kedì te suluguen nu he layun duen egkehimu he hadì he sevaha te menge kevuwazan ku. ²⁸ Nengazen he MEGBEVAYÀ, iyan ka kes tutuu he Megbevayà! Insaad nu heini is menge meupiya kedì te suluguen nu, ne utew egkeserigi is menge saad nu. ²⁹ Egkesuatan ku he igkelipey nu is kedtuvazi nu te pemilya ku wey mebpedayun heini minsan keenu ziyà te etuvangan nu, su iyan heini menge saad nu, Nengazen he MEGBEVAYÀ. Ne tenged kayi te kedtuvad nu, egkezeyzey is pemilya ku taman te taman.”

8

Is menge Kezeegan ni David te menge Kuntada Zin

(1 Cronica 18:1-17)

¹ Hein huziyan he timpu nezaag ni David is menge Filistihanen ne nesakup din en sikandan. Naagew zin diyà te kandan is lugar he Meteg Ama. ² Nezaag daan ni David is menge Moabitanken. Impehizegè din sikandan diyà te tanà he impelinya ne midsukud din te pisi. Ne is ne-seled te kada zezuwa he sukud te pisi ne mibpenhimetayan, ne is nengesakup te iketelu he sukud te pisi ne wazà penhimetayi. Is duma he menge Moabitanken he wazà himetayi, ne midsakup ni David ne imevayad din sikandan te vuhis diyà te kandin.

³ Nekidtebek daan si David ki Hadì Hadadezer he hadì te Zoba, he anak ni Rehob, hein egenat en si Hadadezer su ed-umanan din te ed-agew is tanà he uvey te Wahig he Eufrates. ⁴ Naagew eni David is 1,000 he menge kerwahi zan, 7,000 he ebpemen-untud te kerwahi, wey 20,000 he menge sundaru. Mibpemiangan eni David haazà is menge kudà he eguyud te kerwahi gawas te 100 he insamè din su egemiten din.

⁵ Hein nemekeuma is menge tig-Aram he ziyà ebpuun te Damascus su edtavang ki Hadadezer, mibpenhimetayan eni David is 22,000 kandan. ⁶ Mibpevaal si David te menge kampu ziyà te Damascus, he lugar te menge Aramihanen. Ne nehimu en he nesakup din sikandan, ne ebayad dan te vuhis diyà te kandin. Impezaag si David te NENGAZEN, minsan hendei sikandin ebpevayà is ebpekidtebek. ⁷ Migkuwa ni David is menge vulawan he menge kelasag te menge upisyal ni Hadadezer, ne mid-uwit din diyà te Jerusalem. ⁸ Migkuwa zin daan is mezakel he menge brunsi ziyà te Beta wey ziyà te Berotai, he menge sakup te inged ni Hadadezer.

⁹ Ne netuenan heini ni Hadì Tou he hadì te Hamat he nezaag ni David is langun he sundaru ni Hadadezer. ¹⁰ Umbe, impehendiyè din is anak din he si Joram te ki Hadì David te kebpengemusta kandin wey kebegy kandin te zengeg tenged te kezeegan din ki Hadadezer te kebpkidtebek. (Heini si Tou wey si Hadadezer ne neuget en he telekuntada.) Mid-uwit si Joram te menge azen he pelata, vulawan, wey brunsi he igasa zin. ¹¹ Inhalad heini ni Hadì David

diyà te NENGAZEN, iring ded te mid-ulaula zin te nengaagew zin he menge pelata, menge vulawan, diyà te zuma he menge nasyun he nengezaag din he iyan is: ¹² Edom, Moab, Ammon, Filistia, wey Amalek. Inhalad din daan is nengaagew zan diyà te ki Hadì Hadadezer he hadì te Zoba, he anak ni Rehob. ¹³ Utew nevantug si David te kegkepetaya zin duen te 18,000 he menge Edomanhen diyà te menge sugud he egngезanan te Timus. ¹⁴ Mibpevaal sikandin te menge kampu ziyà te tivuuk he Edom, ne nehimu he menge sakup din is langun he menge Edomanhen. Impezaag te NENGAZEN si David minsan hendei sikandin ebpevayà is ebpekidtebek.

Is menge Upisyal ni David

¹⁵ Nehimu he hadì si David te tivuuk he Israel ne mibeelan din is metazeng wey hustu para te langun he menge etew zin. ¹⁶ Ne iyan pengulu te menge sundaru zin, si Joab he anak ni Zeruya. Ne iyan midserigan te menge libru te ginhedian din, si Jehoshafat he anak ni Ahilud. ¹⁷ Is lavew he menge memumuhat ne iyan si Zadok he anak ni Ahitub wey si Ahimelec he anak ni Abiatar. Ne iyan sikritaryu si Seraya. ¹⁸ Is pengulu te tiggbantey ki David he menge Kiritnen wey menge Pilitnen, iyan si Benaya he anak ni Jehoyada. Ne is menge anak ni David he menge maama, iyan megsesambag din.

9

Si David wey si Mefiboshet

¹ Ne sevaha he andew, nenginginsà si David te, “Duen pe be nesamà te pemilya ni Saul he igkepeehè ku kandin is gagew ku tenged ki Jonatan?” ² Impetawag din is sevaha he etew he eggezanan ki Ziba, he suluguen dengan te pemilya ni Saul. Hein nekeuma sikandin ne mid-insaan sikandin ni David, “Iyan ke ve si Ziba?” Midtavak sikandin te, “Uya, Mahal he Hadì.” ³ Mid-insà is hadì, “Duen pe be nesamà he pemilya ni Saul he igkepeehè ku kandin is keupiya te Megbevayà?” Midtavak din is hadì te, “Duen pa, kes anak ni Jonatan he maama he nepigket.” ⁴⁻⁵ Mid-insà is hadì te, “Hendei sikandin?” Midtavak si Ziba te, “Diyà te Lo Debar, diyà te valey ni Makir he anak ni Amiel.” Ne midsugù si David te ibpekuwa kandin diyà.

⁶ Is ngazan te anak ni Jonatan ne iyan si Mefiboshet ne apù sikandin ni Saul. Hein nekeuma sikandin diyà te ki David ne midluhud sikandin he edtahud. Migkagi si David te, “Mefiboshet?” Ne midtavak sikandin te, “Uya, datù.” ⁷ Migkegiyan ni David sikandin te, “Kenè ka mahandek, su ibpeehè ku kenikew is keupiya ku tenged te amey nu he si Jonatan. Id-uli ku kenikew is langun he menge tanà te apù nu he si Saul, ne kenà iyan dà heeyan, kekenà, kayi ku en sikew ibpekaan duma kedì.” ⁸ Midluhud si Mefiboshet ne migkagi te, “Hentei e ves is utew nu igkegagew? Iring e zè man te minatey he asu.”

⁹ Ne impetawag te hadì si Ziba, he suluguen dengan ni Saul, ne migkegiyan din te, “Ibegey ku ki Mefiboshet, he apù te egalen nu he si Saul, is langun he azen ni Saul wey te pemilya zin. ¹⁰ Sikew,

is menge anak nu, wey is menge suluguen nu iyan edterebahu te tanà para kandin, ne uwita nu ziyà te kandin is menge abut, para zuen egkekaan te pemilya zin. Ne si Mefiboshet mulà iyan ad ebpekaan kandin kayi te kedì.” (Si Ziba ne zuen din 15 he anak he menge maama ne 20 is suluguen din.)

¹¹ Migkegiyan ni Ziba is hadi te, “Mahal he Hadi, edtumanen ku is minsan hengkey he idsugù nu kedì te suluguen nu.” Puun dutun, diyè en egkaan si Mefiboshet te ki David he iring te sevaha te menge anak din.

¹² Duen anak ni Mefiboshet he maama he egezezanan ki Mica. Is langun he sakup te pemilya ni Ziba ne nehimu en he suluguen ni Mefiboshet. ¹³ Si Mefiboshet is pigket ne ziyè en med-ubpà te Jerusalem ne ziyè en daan layun egkaan duma ki Hadi David.

10

Nezaag ni David is menge Amunihanen wey menge Aramihanen

(1 Cronica 19:1-19)

¹ Dutun te huziyan he timpu, minatey si Nahash he hadi te menge Amunihanen. Ne is anak din he si Hanun iyan nekeilis kandin te kedhadì.

² Migkagi si David te, “Ibpeehè ku ki Hanun is meupiya he kebpekidepitè ku kandin tenged te meupiya zaan is kebpekidepità te amey zin kedì.” Umbe impehendiyà ni David is menge upisyal para ibpeehè din is kebpekid-unung din te kelised ni Hanun dutun te kebpatay te amey zin.

Piru hein nekeume en haazà is minge upisyal ni David diyà te tanà te minge Amunihanen, ³ migkagi is minge upisyal te minge Amunihanen diyà te ki Hanun te, “Kunaan nu vuwa ke egketenuzan ni David is amey nu kayi te kedsugù din te minge etew para ed-unung kenikew te kelised? Kenà, su midsugù din buwa sikandan su para ibpepeniid te inged tew su wey kiw zin mezezeeti?” ⁴ Ne zutun impezakep ni Hanun is minge sakup ni David ne migkiskisan is ketengà te sumpè dan. Impetavas din daan is minge kumbalè dan puun te hawak pehendiyà te dizalem ne human ipeuli sikandan. ⁵ Egkeeled dan he ed-uli. Hein netuenan ni David is nehitavù te minge sakup din, ne midsugù sikandin te minge menunudtulà he ebpekegiyan haazà is minge sakup din te diyè dan dà dèpa te Jerico taman te ebme-layat haazà is minge sumpè dan, ne human dan med-uli.

⁶ Neisip-isip dutun te minge Amunihanen he egkepeukan dan ni David. Umbe midsuhulan dan is 20,000 he Aramihanen he minge sundaru he tig-Bet Rehob wey tig-Zoba, 1,000 he sundaru he ebpuun te hadi te Maaca, wey 12,000 he sundaru he ebpuun te Tob. ⁷ Hein nezineg heini ni David, impehendiyè din si Joab wey is langun he minge sundaru he memevurut he ebpekidtebek. ⁸ Mibpelastar en is minge Amunihanen diyà te pultahan te inged dan para te kebpekidtebek, ne is minge Aramihanen he tig-Zoba wey tig-Rehob wey is minge sundaru he tig-Tob wey tig-Maaca ne mibpelastar zan en daan diyà te minge sugud.

⁹ Hein naahà ni Joab haazà is minge kuntada

zan diyà te egkesineruwan dan wey ziyà te egkeiniyugan dan, mibpili din is utew menge metau he sundaru te Israel ne iyan en sikandin mibpengulu te kebpekidtebek te menge Aramihanen. ¹⁰ Ne is nesamà dutun he menge sundaru ne impepenguluwan din ki Abishai he suled din para te kebpekidtebek te menge Amunihanen. ¹¹ Migkegiyan ni Joab si Abishai te, “Emun egkeerangan nu he egkezaag key te menge Aramihanen ne tevangi key keniyu, ne emun daan egkeerangan dey he egkezaag kew te menge Amunihanen edtevangin dey zaan sikiyu. ¹² Ebpekezesen kiw! Ebpekevurut kiw he ebpekidtebek para te menge keet-etawan tew wey te menge inged te Megbevayè tew. Su ebeelan te NENGAZEN ke hengkey is meupiya para kandin.” ¹³ Ne zutun midsurung en si Joab дума is menge sakup din, ne nekepelaguy is menge Aramihanen. ¹⁴ Hein naahà te menge Amunihanen he mibpemelaguy en is menge Aramihanen, mibpeleguyan dan daan si Abishai ne nemeneled dan diyà te inged dan. Umbe nemen-ulì ensi Joab diyà te Jerusalem puun dutun te kebpekidtebek dan te menge Amunihanen.

¹⁵ Hein neisip te menge Aramihanen he egkezaag sikandan te menge Israilihanen, ne miburunburun dan med-uman. ¹⁶ Midtevangin sikandan te zuma he menge Aramihanen he impetawag ni Hadadezer he ebpuun te diyà layun te Wahig he Eufrates. Ne midhendiyè dan te Helam he iyan mibpengulu kandin si Shobac he iyan peremandar te menge sundaru ni

Hadadezer.

¹⁷ Hein netueanan haazà ni David, midtigum din is langun he minge sundaru te Israel para te kebpekidtebek. Ne midrapas dan te Wahig he Jordan ne midhendiyè dan te Helam. Nekaandam en is minge Aramihanen para te kebpekidtebek ki David, ne zutun midtebek sikandan. ¹⁸ Piru nepeleguyan te minge Aramihanen is minge Israilihanen. Ne 700 he ebpemen-untud te kerwahi is nengepatey eni David wey 40,000 he pereuntud te kudà. Nepatey zan daan si Shobac, is peremandar te minge sundaru. ¹⁹ Hein naahà te minge hadi te minge Aramihanen he minge sakup ni Hadadezer he egkezaag sikandan te minge Israilihanen, mibpekid-emigu zan te minge Israilihanen ne mibpesakup en sikandan te Israel. Umbe puun dutun nengahandek en is minge Aramihanen he edtavang te minge Amunihanen.

11

Si David wey si Batsheba

¹ Neuma is timpu he iyan tinghipanew te minge hadi te kebpekidtebek, wazà mulà medhipanew si David, diyè dà sikandin mebpelintetagak te Jerusalem. Iyan din dà impehipanew te kebpekidtebek si Joab, wey is minge upisyal zin, wey is langun he minge sundaru te Israel. Nezaag eni Joab is minge Amunihanen ne midlingutan dan is Raba.

² Hein sevaha he mahapun dutun te megaan en edsanlep is andew, mid-eneu si David ne midhiphipanew zuen te patag he atep te turugan din. Dutun te ebpememantew sikandin, nehe

din diyà te zizalem is utew metaid he vahi he ebpemezigù. ³ Midsugù si David te ibpaahà haazà ke hentei he vahi. Ne midtudtulan sikandin te haazà he vahi ne si Batsheba, he anak ni Eliam wey esawa ni Uria he Hitihanen. ⁴ Ne zutun impekuwa ni David si Batsheba. Ne hein nekeume en sikandin diyà te ki David, ne mibpehulizè dan. (Bevegu pa zutun he nepasad ni Batsheba is tulumanen te kebpenlumpiyu tenged te vinulan he ebpekeuma te vahi.) Nepasad dutun is kebpeked-hulid dan ne mid-uli sikandin.

⁵ Wazà meuget ne egkegezam ni Batsheba he megingey en sikandin, ne mibpenelaan sikandin he ebpetudtulan si David he megingey sikandin.

⁶ Umbe, mibpeuwit si David te lalag diyà te ki Joab he ibpehendiyà si Uria he Hitihanen te kandin. Umbe impehendiyà ni Joab si Uria te ki David.

⁷ Hein nekeuma si Uria, mid-insaan ni David sikandin te kemusta si Joab, is menge sundaru, wey is kebpekidtebek dan. ⁸ Ne migkegiyan ni David sikandin te, “Uli ke en diyà te valey nu, wey medhimeley.” Ne mid-awà si Uria zutun te turugan ne mibpeuwit si David te gasa ziyà te valey ni Uria. ⁹ Piru wazà med-uli si Uria, kekenà, diyè dà sikandin medlipezeng te gemawan te turugan duma is menge suluguen dutun te egalen din he si David.

¹⁰ Hein netudtulan si David he wazà med-uli si Uria, impetawag din ne mid-insaan din te, “Maan is wazè ka med-uli? Neuget en he wazè ka mekeuli diyà te keniyu.” ¹¹ Midtavak si Uria te, “Sikan is Kavan te Kebpekid-uyun wey is menge sundaru te Israel wey Juda diyà te kampu zan diyà te menge

sugud, ne zutun daan is peremandar zey he si Joab wey is menge upisyal zin. Ebpekehimu e pe be he ed-uli te kegkaan, ked-inum, wey te kedhulid te esawa ku? Ibpenangdù ku kenikew he kenè ku egkeulaula is iring kenihan.”¹² Migkegiyan ni David sikandin te, “Pelintetagak ke zà dèpa kayi te senge kezukileman, ne keeselem ibpelikù ku sikew ziyà te kampu.” Ne zutun mebpelitetagak si Uria te haazà he andew ziyà te Jerusalem. Dutun te sunud he andew,¹³ midhinggat sikandin ni David he megkaan wey med-inum duma kandin, ne midhubug sikandin ni David. Piru haazà he kezukileman wazè ded sikandin mekeuli, kekenà, nekeuman ded sikandin mekelipezeng duma kes menge suluguen ni David.

¹⁴ Meselem dutun, midsurat si David pehendiyà te ki Joab he impeuwit din ki Uria. ¹⁵ Iyan heini tagù dutun te surat din: “Iyan ibpehuna si Uria, emun hendei is dekelà he tebek, ne ewai niw en para mepatey sikandin.” ¹⁶ Dutun te kemulu en edlinguti eni Joab is Raba, ne ziyè dan ipezapit si Uria te lugar he zutun is menge melig-en he menge sundaru te menge kuntada. ¹⁷ Nemenggawas haazà is menge sundaru zutun te inged ne mibpekidtebek dan, ne nepatey zutun si Uria wey is duma pa he menge sundaru ni David.

¹⁸ Mibpeuwit si Joab te tudtul ziyà te ki David mehitenged te langun he nehitavù te tebek. ¹⁹ Midteleenan din haazà is ibpepenudtul te, “Emun egkekagi nu en diyà te hadi is mehitenged te tebek, ²⁰ kela ke egkepauk sikandin ne ed-insaan ke zin te, ‘Maan is mid-uvey kew utew

zutun te inged is ebpekidtebek? Wazè niw ve metueni he egkesaut kew man te panè dan puun te verengbeng dan? ²¹ Kenè niw ves egketenuzan ke hengkey is ingkepetaya ki Abimelec he anak ni Jerubeshet diyà te Tebez? Kenè be iyan impatey zin is mid-ulugan te vahi te gelingan he vatu puun diyà te zivavew te verengbeng, ne minatey sikandin? Maan is utew kew mid-uvey zutun te verengbeng?’ Ne emun iyan heini ibpenginginsè din, ne kegiyi nu en sikandin te, ‘Nepatey kes suluguen nu he si Uria he Hitihanen.’ ”

²² Migenat haazà is ibpepenudtul, ne hein nekeume en sikandin diyà te ki David ne mid-tudtulan din te langun he intelaan kandin ni Joab. ²³ Migkegiyan din si David te, “Midsurung key te menge kuntada ziyà te menge sugud, piru mibpenlayas dey sikandan he edlikù diyà te pultahan te inged dan. ²⁴ Ne mibpanè key te tigpanè dan he ziyà te verengbeng, ne zuen nengepatey he zuma he menge sundaru nu ne naapil is suluguen nu he si Uria he Hitihanen.”

²⁵ Migkegiyan ni David haazà is mibpenudtul te, “Kegiyi nu si Joab he kenà meseeng te nehitavù, su kenè ta egketuenan ke hentei is egkepatey ziyà te tebek. Kegiya nu he mebpekelig-en sikandin, ne pedeyuna zin te edsurung haazà is inged taman te egkezezetan heini.”

²⁶ Hein netuenan ni Batsheba he nepatey si Uria is esawa zin, ne midlalew sikandin. ²⁷ Neiwas is kedlalew zin, ne impekuwa sikandin ni David ne mid-uwit din diyà te turugan din. Mid-esawa sikandin ni David, ne wazà meuget ne mid-anak sikandin te maama. Piru wazà mesuat is

NENGAZEN te mibeelan ni David.

12

Midsawey ni Natan si David

¹ Midsugù is NENGAZEN te ebpeneuven he si Natan diyà te ki David. Hein nekeuma sikandin diyà te ki David, migkagi sikandin te, “Duen dezuwa he etew he ed-ubpà te sevaha he inged. Is sevaha ne sepian ne is sevaha ne pubri. ² Mezakel utew is kerehidu wey vaka zutun te sepian, ³ piru sikan is pubri ne sebsevaha zà is nati he kerehidu zin he pinemasa zin pa. Mid-elimahan din heini, ne midekelà duma te menge anak din. Impekaan din heini te kandin he keenen, ne impeinum din diyà te kandin he vasu, ne edsepsepipiyen din pa. In-iring din heini te anak din he vahi. ⁴ Sevaha zutun he andew, duen mibpenumbaley zutun te sepian, piru kenà sikandin egkesuat he edlapà te kerehidu wey ke vaka ve para ibpegana zin dutun te megeliyug din. Iyan din migkuwa haazà is nati he kerehidu zutun te pubri he etew ne iyan din midlapà ne iyan impekaan din dutun te megeliyug din.”

⁵ Utew nepeuki ni David haazà is etew he sepian ne migkagi sikandin diyà te ki Natan te, “Idsaad ku ziyà te uuyag he NENGAZEN he engayan he edhimetayan is etew he mibaal zutun. ⁶ Su wazè din kegkehizu zutun te pubri he etew, meupiya ke edliwanan din te heepat haazà is sevaha he kerehidu he nekuwa zin.”

⁷ Ne migkegiyan ni Natan si David te, “Iyan ka haazà! Iyan heini lalag te NENGAZEN he Megbevayà te Israel: ‘Mibpili ku sikew he hadi te Israel

ne midlibri ku sikew ziyà te ki Saul. ⁸ Imbegey ku kenikew is ginhedian din wey is menge esawa zin. Midhimu ku sikew he hadi te tivuuk he Israel wey Juda. Ne emun kurang pa heini ne ed-umanan ku pa te mezakel pa. ⁹ Ne maan is wazè nu tumana is menge lalag ku ne iyan nu maan heini mibeelan is kenè ku igkesuat? Mibpehimentayan nu si Uria he Hitihanen diyà te tebek; mibpehimentayan nu sikandin te menge Amunihanen, ne mid-agew nu pa is esawa zin. ¹⁰ Umbe, tenged te mibeelan nu, puun guntaan layun duen tebek wey ebpehimentayà diyà te pemilya nu, tenged te midsupak a kenikew ne migkuwa nu is esawa ni Uria.’

¹¹ “Iyan pa heini egkegiyen te NENGAZEN: ‘Duen ebpuun te pemilya nu he edsukul kenikew. Ibegey ku is menge esawa nu ziyà te etew he kenè nu selakew, ne ebpekidhulid sikandin kandan minsan duen ebpekaahà. ¹² In-eles nu is kenà meupiya he mibeelan nu, piru is ebeelan ku kenikew ne ibpegawagawa ku mulà.’ ”

¹³ Ne migkegiyan ni David si Natan te, “Nekesalà a te NENGAZEN.” Midtavak si Natan te, “Mibpe-saylu ke en te NENGAZEN, ne kenè ke zed ebpatay kayi he salà. ¹⁴ Piru tenged dutun te mibeelan nu he nekevegey te higayun diyà te menge kuntada te NENGAZEN he egkesumpalit sikandin, siguradu he ebpatay is anak nu.”

¹⁵ Hein mid-ulì en si Natan, impezaru te NENGAZEN is anak ni David diyà te ki Batsheba. ¹⁶ Midhangyù si David diyà te Megbevayà para zutun te vatà. Midseled sikandin diyà te rugu zin ne mibpuasa ne kada mezukilem ne ziyè

dà edlipezeng te saag. ¹⁷ Mibeyaan sikandin te menge upisyal zin su ibpeenew zan, piru kenà sikandin ebpemineg, ne kenà daan sikandin egkaan дума kandan.

¹⁸ Hein ikepitu en he andew, minatey haazà is batà. Nengahandek haazà is menge suluguen ni David he edtazem kandin he minatey en kes batà. Migkagi sikandan te, “Ebmenmenuwen tew en be he mekegiyi tew te minatey en kes batà? Wazè kiw zin man ganì peminega te kedlelagi tew kandin hein uuyag pa haazà is batà, wey pe be guntaan he minatey en haazà is batà. Kela ke zuen mezaat he ebeelan din diyà te lawa zin!”

¹⁹ Hein egkaahà ni David he ednenaasnaas haazà is menge suluguen din, ne netagù diyà te gehinawa zin is minatey en bes kes batà. Mid-insà sikandin te, “Minatey en be kes batà?” Mid-tavak dan te, “Uya.” ²⁰ Ne mid-enuw si David, nemezigù, midheplasan din is lawa zin te mehemut he lana ne mid-ilis. Ne midhendiyà sikandin te valey te NENGAZEN ne midsimba. Nekepasad ne mid-uli sikandin ne mibuyù te keenen, ne migkaan sikandin. ²¹ Migkegiyan sikandin te menge suluguen din te, “Kenè dey egkesavut heini is mid-ulaula nu. Hein uuyag pa kes batà, ne wazè ka megkaan is edsinegew, guntaan te minatey en kes batà, ne mid-enuw ka ne migkaan ka!” ²² Midtavak si David te, “Uya, mibpuasa a wey midsinegew a hein uuyag pa kes batà su iyan egkeisip ku is kela ke mehizuwi e zed te NENGAZEN ne kenè din ded idtugut he mebpatey kes batà. ²³ Piru guntaan te minatey en sikandin,

maan is ebpuasa e pa? Egkeuyag ku pa be sikandin? Keuzemà ke ebpatay a, ebpekehendiyà a te kandin, piru kenè en mulà sikandin ebpekelikù kayi te kedì.”

²⁴ Dutun ne midlangan ni David is esawa zin he si Batsheba ne mibpehulizè dan. Mibmewingey si Batsheba ne mid-anak te maama, ne migngezanan dan sikandin ki Solomon. Mibmahal te NENGAZEN haazà is batà, ²⁵ ne midsugù din is ebpeneuven he si Natan he egngezanan din haazà is batà te Jedidia su mibmahal zin sikandin.

*Naagew ni David is Raba
(1 Cronica 20:1-3)*

²⁶ Midsurung eni Joab is Raba, he iyan kepitäl te Ammon, ne hapit dan en heini egkaagew.

²⁷ Midsugù si Joab te menge etew he ibpepenudtul ziyà te ki David he egkagi te, “Midsurung dey is Raba ne naagew zey is kuweey zan te wahig.

²⁸ Umbe, tiguma nu is nengesamà he menge sundaru wey leusa nu en te ed-agew haazà is inged para iyan ka egkevantug ne kenà a iyan.”

²⁹ Dutun midtigum ni David is langun he nesamà he menge sundaru ne midsurung dan is Raba, ne naagew zan heini. ³⁰ Migkuwa ni David is bulawan he inkuruna te ulu te hadì te menge Amunihanen ne insuup te ulu zin. Ne is kevegat kayi he kuruna ne menge 35 he kilu, ne zuen kayi mahalen he menge vatu. Ute w mezakel he menge azen is nengekuwa ni David dutun he inged. ³¹ Mid-uripen din is menge mengineged kayi ne impemeterebahu zin he egamit te menge gavas, piku, wey wasey. Impevaal zin daan sikandan

te minge brik. Iyan heini mibpeveelan din te langun he minge meginged diyà te minge inged te minge Amunihanen. Ne mid-ulì si David diyà te Jerusalem wey is langun he minge sundaru zin.

13

Si Amnon wey si Tamar

¹ Duen utew mekempet he anak he raga ni David he egngезanan ki Tamar, he suled ni Absalom. Si Amnon ne suled ni Tamar ziyà te amey, ne mibmahal ni Amnon si Tamar. ² Piru kenè din egkehimu is egkesuatan din he ebeelan diyà te ki Tamar su raga pa si Tamar ne zuen layun ebantey kandin. Ne tenged dutun midsiveysivey sikandin, ne hein neuget ne midezaru sikandin.

³ Duen elukuy ni Amnon he metau he edseligkep he iyan is id-agew zin he si Jonadab. Anak sikandin te suled ni David he si Simea. ⁴ Ne sevaha he andew, mid-insaan din si Amnon te, “Anak ka te hadi, maan is kada andew egkeehè ku sikew he henduen te meluya ka? Kegiya nu kedì ke hengkey is igkeseeng nu.” Midtavak si Amnon te, “Egkesuatan ku si Tamar, is hazi ni Absalom te suled ku ziyà te amey.” ⁵ Migkagi si Jonadab te, “Hizegè ka, wey ka mebpezazaru. Ne emun edlauy kenikew is amey nu ne kegiyi nu sikandin he tuguti zin si Tamar he medhendiyà te kenikew, he iyan ebpekaan kenikew. Kegiyi nu sikandin he egkesuatan nu he egkeehè nu si Tamar he iyan ed-andam te keenen nu zutun te uvey nu he iyan edsungit kenikew.”

⁶ Umbe, midhidhizegà si Amnon he ebpezazaru. Hein midlauy sikandin ni Hadì David, migkagi

sikandin te, “Egkesuatan ku pezem he medhengkayi is etevey ku he si Tamar wey mekevaal te supas kayi te uvey ku, ne egkepasad ne sungite e zin.” ⁷ Ne midsugù si David he ebpekegiyan si Tamar ziyà te valey te hadi he medhendiyà sikandin te meemahan din he si Amnon su iyan sikandin ibpevaal te keenen para kandin.

⁸ Midhendiyà si Tamar te valey te meemahan din he si Amnon, ne zutun neehè din he edhidhizegà. Ne migkuwa sikandin te herina, ne mibmasa zin heini, ne zutun din lutua te uvey ni Amnon. ⁹ Hein nelutù en haazà, ne migkuwa zin heini su ibpekaan din ki Amnon, piru kenà egkaan si Amnon. Migkagi si Amnon te, “Ipegawas is langun he menge etew kayi!” Dutun nenggawas is menge etew. ¹⁰ Ne migkegiyan ni Amnon si Tamar te, “Uwita nu heeyan is keenen kayi te uvey ku ne sungita a.” Ne mid-uwit ni Tamar haazà is keenen dutun te ki Amnon. ¹¹ Piru zutun te edsungiten din en si Amnon ne migkepkepan ni Amnon sikandin ne migkegiyan din te ebpehulizè dan.

¹² Migkegiyan ni Tamar sikandin te, “Kenà a leyuga! Telesuled ki! Kenè nu veeli heini is mekeeled-eled he vaal kayi te kedì. Kenà heini engayan he egkeulaula kayi te Israel. ¹³ Hengkey en buwa he paras is igkeetuvang ku te menge etew? Minsan sikew, buneg is igngazan kenikew kayi te Israel. Hengyua nu is amey ta mehitenged kayi; siguru he ebpepeminggen ke zin ke ebpengesawa ka kedì.”

¹⁴ Piru wazà mebpeminggen is Amnon kandin, ne tenged te mezesen si Amnon ki Tamar ne mid-

layug din sikandin. ¹⁵ Ne zutun, utew nepauk si Amnon kandin, su is utew zin kegkepauk kandin lavew pa te kebmahala zin kandin dutun te nehuna he timpu. Migkegiyan ni Amnon sikandin te, “Enew ka wey megawas!” ¹⁶ Midtavak si Tamar te, “Kenà a egawas! Lavew pa utew he zekelà he salè nu is kedsegsega nu kedì kenà heini is mid-ulaula nu kedì.” Piru wazà haazà peminega ni Amnon. ¹⁷ Kekenà, mid-umew zin is suluguen din ne migkegiyan din te, “Ipegawas niw heini he vahi ne lekevi niw is gemawan.”

¹⁸ Umbe, impegawas dutun si Tamar te suluguen ne midlekevan is gemawan. Ne zutun migkukumbalà si Tamar te meupiya he visti wey melayat su iyan haazà neleyaman he ibivisti te raga he anak te hadì te haazà he timpu. ¹⁹ Iyan mid-ulaula ni Tamar zutun is, mibindas din haazà is meupiya he visti wey melayat, ne mibukbukan din is ulu zin te avu. Ne midhipanew is edsinsingew ne mid-elangan din te velad din is dagwey zin.

²⁰ Ne naahà sikandin te kakey zin he si Absalom ne mid-insaan din, “Duen be mezaat he mibeelan kenikew ni Amnon? Kenè nu heini tudtula ziyà te zuma, su telesuled kew ziyà te amey. Kenè nu itagù diyà te isip nu is neulaula kenikew.” Ne zutun diyà med-ubpà si Tamar te valey te kakey zin he si Absalom, ne layun dà sikandin edsebsevaha is edlalew.

²¹ Hein netuenan ni Hadì David is neulaula, utew sikandin nepauk. ²² Ne si Absalom, egkeepesan din utew si Amnon su mibpeel-elezan ni Amnon is etevay zin he si Tamar. Tenged kayi, kenè en sikandin ebpekidlalag ki Amnon.

²³ Midlavey zutun is dezuwa he tuig, hein ebpeelutan ni Absalom is menge kerehidu zin diyà te Baal Hazor, uvey te Efraim, mid-imbitar zin is langun he anak te hadi te kedtelavuk dutun.

²⁴ Midhendiyà sikandin te ki Hadi David he egkagi te, “Ebpeelutan ku is menge kerehidu ku. Edhendiyè ke ve wey is menge upisyal nu te kedtelavuk kayi he kevrunan?”

²⁵ Midtavak kes hadi te, “Kenè en, mama, su egkegestuwan ke zà ke edtelavuk key is langun.” Ne midtegel sikandin ni Absalom, piru kenà iyan ebpehendiyà. Mibpenubtuvazan din dà si Absalom.

²⁶ Migkagi si Absalom te, “Emun kenè ka, ne si Amnon dà nasi he suled ku is iphendiyè nu.” Mid-insà is hadi te, “Maan is utew nu egkinehenglana he ibpehendiyà?” ²⁷ Piru midtegel iyan si Absalom, ne impezume en nasi ni David si Amnon, wey kes duma he menge anak din he maama.

²⁸ Migkegiyan ni Absalom is menge sakup din te, “Tegazi niw ke egkelangut si Amnon, ne emun edsinyas a, ne himetayi niw en sikandin. Kenè kew mahandek; su iyan a midsugù keniyu. Pekezesen kew wey pekevurut kew.”

²⁹ Ne zutun midhimetayan te menge sakup ni Absalom si Amnon su insugù din. Ne nen-untud is duma he menge anak he maama ni David te menge kudè dan ne nemelaguy zan.

³⁰ Hein ed-ulì dan en diyà te Jerusalem, duen neketudtul ki David he mibpenhimetayan ni Absalom is langun he menge anak din he maama ne wazà nesamà.

³¹ Midhitindeg si David ne mibindas din is kumbalè din su impehè din he utew sikandin ne-

seeng, ne midlangkeb diyà te tanà. Mibpemindas daan te menge suluguen din is menge kumbalè dan ne midhitindeg dan dà mulà. ³² Piru migkagi si Jonadab he anak te suled ni David he si Simea, “Mahal he Hadì, wazà mepatey is langun he menge anak nu he maama, kekenà, iyan dà si Amnon. Neuget dà he duen planu ni Absalom te kedhimetayi zin ki Amnon puun dà dutun te andew te kedleyuga ni Amnon te suled din he si Tamar. ³³ Kenè nu ikeseeng is tudtul he nengepatey is langun he menge anak nu he maama. Iyan dà si Amnon minatey. ³⁴ Ne si Absalom, ne mibpelaguy sikandin.”

Dutun he timpu is ebantey zuen te verengbeng te Jerusalem duen din naahà he utew mezakel he menge etew he ebpelingguma he ziyà mebayà te zivaluy he kilid te vuvungan. Midhendiyà te hadì haazà is ebantey ne nenudtul te, “Duen ku naahà he menge etew ziyà te zalan te Horonaim he ebpelegidlid te vuvungan.” ³⁵ Migkegiyan ni Jonadab is hadì te, “Mahal he Hadì, ahaa nu! Heeyan en kes menge anak nu he menge maama, he iyan migkagi ku geina.” ³⁶ Nepasad dutun is kegkegiyi zin ki David nekeuma kes menge anak ni David he ebpemeninegew. Ne midsinegew zaan si David wey langun he menge sakup din. ³⁷⁻³⁸ Midlalew si David te melugayad he timpu tenged te anak din he si Amnon.

Hein mibpelaguy en si Absalom, midhendiyà sikandin te hadì te Geshur he si Talmai, he anak ni Amihud. Diyà sikandin med-ubpà seled te tetelu he tuig. ³⁹ Hein malù en neulii si Hadì David te kegkeseeng din te kegkepatey ki Amnon, ne

ebulungen sikandin ki Absalom.

14

Midlikù si Absalom diyà te Jerusalem

¹ Netuenan ni Joab he anak ni Zeruya he ebulungen si Hadì David ki Absalom. ² Umbe, impetawag din is sevaha he vahi he uluwanen he ziyà te Tekoa. Hein nekeuma haazà is bahi, migkegiyan ni Joab te, “Uvag kun edlalew ka te minatey. Kukumbalè ka te visti he ibivisti te edlalew, ne kenè ka mebpurungpurung, kekenà, iringi nu is ulaula te vahi he neuget en is kedlalew zin tenged te minatey. ³ Ne pehendiyè ka te hadì ne kegiya nu kandin is migkagi ku kenikew.” Ne migkagi ni Joab kandin is egkegiyen din diyà te hadì.

⁴ Hein nekeuma haazà is bahi ziyà te hadì, midluhud sikandin tuus te kedtahud he egkagi te, “Tevangi a, Mahal he Hadì!” ⁵ Mid-insaan sikandin te hadì, “Hengkey ves is igkeseeng nu?” Midtavak sikandin te, “Sevaha a he valu, ⁶ ne zuen dezuwa he anak ku he maama. Sevaha zutun he andew midtebek sikandan is dezuwa ziyà te pemuleey, ne tenged te wazà edsambag kandan dutun, ne nepatey is sevaha. ⁷ Ne zutun nemenhendiyà is langun he menge kezuzumahi ku he egkagi te, ‘Ivegey nu kenami heeyan is anak nu, su edhimetayan dey sikandin su midhimetayan din is suled din. Kenà engayan sikandin he ebpengevilin te ketigeyunan te amey zin.’ Emun ebeelan dan heini, egkaawà kayi te kedì is nesamà he anak ku he iyan dà edserigan ku he ebpekeugup kedì, wey egketazin en is ngazan te esawa ku kayi te kelibutan.”

⁸ Migkegiyan te hadi haazà is bahi te, “Uli ke en su iyan e en metau. Egkegiyan ku sikandan he kenè dan menuwa is anak nu.” ⁹ Migkagi haazà is bahi te, “Mahal he Hadi, ke zuen edsumbung kenikew tenged te mid-ugupan a kenikew, ne televaken ku wey te pemilya ku heeyan ne kenà kenikew.” ¹⁰ Midtavak is hadi te, “Emun duen edriklamu ziyà te kenikew, ne dumaha nu sikandin kayi te kedì, ne kenè ke zin en ed-umanan edriklamuwi.” ¹¹ Ne migkagi haazà is bahi te, “Mahal he Hadi, emun egkehimu ne penangdù ka ziyà te NENGAZEN he Megbevayè nu he kenè nu tuguti he zuen ebales te anak ku para kenà sikandin mepatey wey wazè en дума pa he egkeulaula.” Midtavak si Hadi David te, “Ibpenangdù ku te uuyag he NENGAZEN he wazè en egkevut te anak nu.”

¹² Migkagi haazà is bahi te, “Mahal he Hadi, duen pa sevaha he idsarig ku kenikew.” Midtavak haazà is hadi te, “Uya, hengkey heeyan?”

¹³ Migkagi haazà is bahi te, “Kenè be salè nu heeyan diyà te menge etew te Megbevayà is kedlevani nu te anak ku piru is kenikew he anak he mibpelaguy ne wazè nu ipeuli?” ¹⁴ Is langun he etew ebpatay, iring te wahig he egkeulaan diyà te tanà he kenè en ebpekelikù. Piru kenà igkesuat te Megbevayà is kegkuwaa te untung te etew; iyan pa gani egkesuatan din he medlikù diyà te kandin is menge etew he mibpekeziyù kandin.

¹⁵ “Mahal he Hadi, midhengkayì a su edtudtulen ku kenikew is prublima ku su egkahandek a te ebeelan kedì te menge kezuzumahi ku. Egkeisip ku is ebpekidlalag a kenikew su kela ke ebpeminengen nu is hangyù ku kenikew ¹⁶ he luwasa a

wey is minge anak ku te minge etew he ebpe-lenuwan dan te egkuwa is tanà he imbegey te Megbevayà kenami. ¹⁷ Umbe guntaan is egkegiyen nu ne iyan ebpekevegey kedì te kelinew su iring ka te velinsuguen te Megbevayà su netau ka te meupiya wey mezaat. Berakat he zumahi ka te NENGAZEN he Megbevayè nu.”

¹⁸ Ne migkegiyan te hadì haazà is bahi te, “Uya, tudtuli a te tutuu mehitenged te id-insè ku kenikew.” Midtavak haazà is bahi te, “Uya, Mahal he Hadì.” ¹⁹ Mid-insà is hadì te, “Iyan be si Joab mibpenurù kenikew kayi?” Midtavak haazà is bahi te, “Kena a ebpekevelivad te tavak te insè nu, Mahal he Hadì. Uya, si Joab he suluguen nu is midsugù kedì te kebaal kayi wey iyan sikandin mibpenurù ke hengkey is egkegiyen ku. ²⁰ Mibeelan din is iring kayi para kun mebmeupiya is kedepitè niw ki Absalom. Piru netuenan nu heini, Mahal he Hadì, su iring ka te velinsuguen te Megbevayà-netuenan nu is langun he egkeulaula kayi te nasyun tew.”

²¹ Ne impetawag te hadì si Joab ne migkegiyan te, “Uya, hipanew ka ne dumaha nu si Absalom ke edlikù ka kayi.” ²² Midluhud si Joab su edtahud te hadì ne migkagi te, “Berakat he tuvazi ka te NENGAZEN, Mahal he Hadì. Guntaan netuenan ku he nezeligan a kenikew su midtuman nu is hangyù ku.” ²³ Ne migenat si Joab pehendiyà te Geshur, ne miduma zin si Absalom te edlikù diyà te Jerusalem. ²⁴ Piru migkagi is hadì te, “Dutun niw ipeubpà sikandin te valey zin; kenè ku egkesuatan he meehè ku kayi te turugan.” Ne

mid-ulì si Absalom diyà te valey zin ne wazè en sikandin mebpaaHà te hadì.

²⁵ Wazà ebpekeiring te ketaid ni Absalom te tivuuk he Israel, umbe utew sikandin egkevantug te langun. Wazà igkesawey kandin puun te ulu pehendiyà te parapara. ²⁶ Kesevaha zà sikandin ebpaalut te senge-tuig, ne ebpaalut sikandin su egkevegatan sikandin te bulvul zin. Emun edtimbangen is bulvul zin ne zezuwa he kilu is kevegat emun dutun te timbangan te hadì. ²⁷ Duen menge anak ni Absalom he tetelu he menge maama ne sevaha is bahi. Is ngazan dutun te vahi ne si Tamar, ne utew heini sikandin metaid. ²⁸ Diyà med-ubpà si Absalom te Jerusalem seled te zezuwa he tuig he wazè din maahà is hadì.

²⁹ Sevaha zutun he andew, impetawag ni Absalom si Joab su ibpehendiyè din te hadì para melelagi zin mehitenged kandin. Piru wazà mebpeming si Joab he ibpehendiyà ni Absalom. Impeuman din ipetawag si Joab, piru wazà gihapun medhendiyà. ³⁰ Migkegiyan ni Absalom is menge suluguen din te, “Binsuli niw is menge pemuleey ni Joab he mibpemulaan te barli. Durug dà te vevesukè ku.” Umbe mibinsulan dan is bevesukà ni Joab.

³¹ Midhendiyà si Joab te ki Absalom he egkagi te, “Maan is mibinsulan te menge suluguen nu is bevesukè ku?” ³² Midtavak si Absalom te, “Tenged te wazè ka medhendini te kebpetawaga ku kenikew. Egkesuatan ku pezem he medhendiyè ka te hadì wey nu meinsai sikandin ke maan is impaangey e zin pa ziyà te Geshur. Meupiya pa pezem ke diyè e zà. Guntaan, egkesuatan

ku he meehè ku is hadi; emun nekesalà a, ne pehimetayi e zin.”

³³ Midhendiyà si Joab te hadi, ne midtduftul zin is migkagi ni Absalom. Impetawag te hadi si Absalom, ne hein nekeuma sikandin, midluhud sikandin su edtahud te hadi. Ne zutun midhezekan sikandin te hadi.

15

Duen Planu ni Absalom he Edsukul

¹ Nenlavey is menge timpu nekekuwa si Absalom te menge kerwahi wey menge kudà, wey 50 he etew he vantey zin. ² Neleyaman ni Absalom is emun egkepukew te meselem ne ziyà edhithitindeg te kilid te zalan pehendiyà te pultahan te inged. Ne emun duen ebpekeuma he etew he zuen sumbung din he ibpehusey te hadi, ne edinsaan din ke hendei ed-ubpà, wey egkagi haazà is etew ke hengkey sikandin he tribu te Israel. ³ Ne egkegiyan ni Absalom sikandin te, “Meupiya wey meketezenganen is sumbung nu piru wazà midserigan te hadi te kedhusey kenian. ⁴ Emun pezem iyan e zà ebpekehusey, ne ebpekeuvey is langun he zuen idsumbung etawa insumbung, ne wazà duwazuwa he ebegayan ku te hustu he kedhusey.” ⁵ Ne emun duen etew he ed-uvey kandin ne edluhud su edtahud kandin, egkepkepan din heini su iyan kegalewgalew zin. ⁶ Iyan heini ebeelan ni Absalom te langun he Israilihanen he ebpehendiyà te hadi su ebpehusey. Umbe neuwit din is menge Israilihanen.

⁷ Neipus dutun is heepat he tuig, migkegiyan ni Absalom is hadi te, “Tuguti a he edhendiyà

te Hebron su edtumanen ku is penangdù ku te NENGAZEN. ⁸ Hein diyè e pa med-ubpà te Geshur he sakup te Aram, nenangdù a he emun ibpe-likù e pa te NENGAZEN diyà te Jerusalem, ne edezapen ku sikandin diyà te Hebron.” ⁹ Migkegiyan sikandin te hadi te, “Uya, meupiya is hipanew nu.” Umbe midhendiyà si Absalom te Hebron.

¹⁰ Hein diyè en si Absalom te Hebron, ne mid-eles-eles sikandin medsugù te menge etew he ibpepenudtul ziyà te tivuuk he Israel he egkagi te, “Emun egkezineg niw is daging te vudying, ne pemensag kew te, ‘Si Absalom en is hadi te Israel, ne ziyà sikandin midhadì te Hebron!’ ” ¹¹ Duen 200 he etew ziyà te Jerusalem he mibpenhingat ni Absalom he meduma kandin diyà te Hebron. Heini he menge etew ne wazà mesayud te planu ni Absalom. ¹² Dutun te kemula pa ebpemuhat si Absalom te menge pemuhat, impetawag din si Ahitofel he ziyà te inged he Gilo. Heini si Ahitofel ne zutun heini he meginged, wey sevaha sikandin te menge megsesambag ni David. Hein neuget ne midmezakel en is midsunud ki Absalom, umbe mibmelig-en utew is pelanu zin te kebpekidsukulà ki David.

Mibpelaguy si David

¹³ Duen sevaha he tigpenudtul he midtazem diyà te ki David he is menge Israilihanen ne midtampu en diyà te ki Absalom. ¹⁴ Ne migkegiyan ni David is langun he menge upisyal zin he zuma zin diyà te Jerusalem te, “Ebpelaguy kiw, su kela ke meumahi kiw ni Absalom kayi, ne penhimetayi kiw wey is langun he meginged kayi te Jerusalem.

Pekegaan kew, emun egkesuat kew he ebpekelikye ki Absalom.” ¹⁵ Migkagi is menge upisyal te, “Mahal he Hadi, andam key he ebaal te minsan hengkey he egkegiyen nu kenami.” ¹⁶ Midhipanew si David duma is langun he nesakup te pemilya zin, piru intagak din is sepulù he esawa zin he kenà menge dungganen para ed-etiman duen te turugan.

¹⁷ Hein edhipanew en ensi David wey is menge sakup din, ne ziyè dan mebpundu te ketepusan he valey zutun te inged. ¹⁸ Ne impehuna ni David is langun he menge sakup din, wey is langun he ebantey kandin he menge Kiritnen wey menge Pilitnen. Ne edsunud daan is 600 he Gitanhen he miduma kandin he ebpuun diyà te Gat. ¹⁹ Migkegiyan ni David si Itai, he pengulu te menge Gitanhen, “Maan is eduma kew kenami? Likù kew ziyà te Jerusalem, ne ziyè kew zuma te vegu he hadi he si Absalom, su menge lumelengyawè kew zà kayi te Israel he mibpemelaguy puun te inged niw. ²⁰ Wazè pa utew meuget is kebpekeuma niw kayi, ne guntaan eduma kew kenami he wazè dey ganì metueni ke hendei key ebpevayà? Likù kew ziyà te menge siringan niw, ne deyzey ke ipaahà te NENGAZEN is gagew zin wey keupiya zin keniyu.” ²¹ Midtavak ni Itai kes hadi te, “Idsaad ku ziyà te uuyag he NENGAZEN wey ziyà te kenikew, Mahal he Hadi, he minsan hendei ka ebpevayà ne eduma key kenikew, minsan kemetayen pa is ebpengkusan.” ²² Migkegiyan sikandin ni David te, “Ne emun iyan heeyan ne zuma kew en kenami.” Ne zutun midhipanew si Itai wey is langun he menge sakup din, wey is menge pemilya zan. ²³ Utew

subra is kebpemeninegew te menge etew ziyà te Jerusalem dutun te kedsagad te menge sakup ni David. Dutun te kedlayun ni David te zal-ug he Kidron, is menge sakup din he ziyà te egkehunaan din midhendiyà te sibsivayan.

²⁴ Ne ziyà daan kes menge memumuhat he si Zadok wey si Abiatar wey kes menge Levihanen he mid-uwit duen te Kavan te Kebpekid-uyun te Megbevayà. Diyè dan isavuk haazà is Kavan te Kebpekid-uyun te kilid te zalan ne nemuhat si Abiatar taman te nekaawà is menge sakup ni David dutun te inged. ²⁵ Ne migkegiyan ni David si Zadok te, “Ilikù kes Kavan te Kebpekid-uyun te Megbevayà diyà te Jerusalem. Emun meupiya is gehinawa te NENGAZEN kedì, ne ibpelikù e zin diyà te Jerusalem ne egkeehè ku zed heini wey is lugar he egkesevukan din. ²⁶ Piru emun kenè e zin en igkelipey ne andam ad minsan hengkey is ekegesuatan din he ebeelan din kedì.”

²⁷ Ne migkegiyan pa ni David si Zadok te, “Likù kew ki Abiatar ziyà te Jerusalem he melinawen, duma is anak nu he si Ahimaaz wey is anak ni Abiatar he si Jonatan, wey kew mekepeniid diyà. ²⁸ Diyà a edtagad te repasan pehendiyà te sibsivayan taman te kenè ku egkezawat is tudtul he ebpuun keniyu.” ²⁹ Ne zutun inlikù ni Zadok wey ni Abiatar kes Kavan te Kebpekid-uyun te Megbevayà diyà te Jerusalem, ne ziyè dan med-ubpà.

³⁰ Midtekezeg si David diyà te Buvungan te menge Olibo. Ne wazè din sendalyas ne edtembunan din is ulu zin he edsinegew. Ne ebpe-

meninegew zaan haazà is menge zuma zin he edtambun daan te menge ulu zan. ³¹ Duen mibpenudtul ki David he si Ahitofel ne sevaha te nekidsevaha ki Absalom. Ne zutun mid-ampù si David, “NENGAZEN, himuwa nu he wazà pulus te sambag ni Ahitofel.”

³² Hein diyè en ensi David te puntur te Buvungan te menge Olibo, he zutun ed-ezapa te menge etew is Megbevayà. Duen midsinugung ki David he si Hushai he Arkanhen. Nengevindas is kumbalè din ne eliyevuken is ulu zin he tuus te edlalew sikandin. ³³ Migkegiyan ni David sikandin te, “Wazà igkeugup nu ke eduma ka kedì. ³⁴ Deyzey ke edlikù ka ziyà te inged ne egkegiyan nu si Absalom te, ‘Suluguen ad kenikew hadì; iring te suluguen a te amey nu zutun te nehuna he timpu, ne guntaan iyan ke en tegisuluguen kedì, ne egkeugupan e pa kenikew he mevelevagi is menge sambag ni Ahitofel.’ ³⁵ Diyà si Zadok wey si Abiatar he menge memumuhat. Kegiya nu ziyà te kandan is langun he egkezineg nu ziyà te turugan te hadì. ³⁶ Ne ipehengkayi nu te kedì is menge anak dan he si Ahimaaz wey si Jonatan te kebpenuudtul te nezineg nu.” ³⁷ Ne zutun midlikù si Hushai he emigu ni David diyà te Jerusalem. Naserengà dutun he midseled si Absalom diyà te inged.

16

Si David wey si Ziba

¹ Hein nekelavey en si David dutun te puntur te vuvungan, midsinugung sikandin ni Ziba he suluguen ni Mefiboshet. Duen dezuwa he asnu

zin he migkergahan te 200 he vuuk he supas, 100 he akup he pasas, 100 he nengeluaran he prutas, wey vinu he ziyà itagù te mibeelan he teleguey he lundis. ² Mid-insaan ni David si Ziba te, “Maan is mid-uwit ka kenihan?” Midtavak si Ziba te, “Heini is menge asnu, ne ebpeuntuzan te pemilya nu, is menge supas wey menge prutas para egkeenen niw te menge zuma nu, ne is binu ed-inumen niw emun egkeveley kew ziyà te sibsivayan.”

³ Mid-insà si David te, “Hendei en be si Mefiboshet, is apù te egalen nu he si Saul?” Midtavak si Ziba te, “Mibpelintetagak sikandin diyà te Jerusalem, tenged te mid-isip din he iyan sikandin edhimuwen he hadi te keet-etawan te Israel kayi he menge timpu te ginhedian te apù din.” ⁴ Migkagi si David te, “Emun iyan heeyan, ne guntaan ibegey ku kenikew is langun he gaked ni Mefiboshet.” Midtavak si Ziba te, “Mahal he Hadì, andam a he ebpenilbi kenikew. Berakat he igkelipey a kenikew.”

Midrewakan ni Shimei si David

⁵ Hein nekeume en si Hadì David diyà te Bahurim, duen etew he migawas dutun he inged ne mibpenrewakan din si David. Heini he etew ne anak ni Gera he kezuzumahi ni Saul he iyan ngazan din si Shimei. ⁶ Mibpenuleng din te watu si David wey is menge upisyal zin minsan te midlingutan si David te menge sakup din wey menge ebantey kandin. ⁷ Iyan heini menge impenrawak din ki David: “Kenè ka seled kayi he inged, sikew is memumunù wey wazè din pulus he etew! ⁸ Migkuwa nu is ginhedian ni Saul, ne guntaan ebelesan ka te NENGAZEN te kedhimetayi

nu ki Saul wey te pemilya zin. Mid-agew nu is ginhedian ni Saul, ne guntaan imbegey heini te NENGAZEN te anak nu he si Absalom. Naawè ka tenged te kebpenhimatey nu.”

⁹ Migkagi ziyà te hadi si Abishai he anak ni Zeruya te, “Mahal he Hadì, maan is ebey-anan nu is kebpenulaa kenikew kenihan he etew he henden dà daan te minatey he asu? Tuguti a kenikew he ebpungelan ku sikandin te ulu.” ¹⁰ Piru migkagi haazà is hadi te, “Sikiyu is menge anak ni Zeruya, hengkey is kelevetan niw? Emun mid-sugù sikandin te NENGAZEN he penrewaki e zin, ne hentei e ves is edawey kandin?” ¹¹ Migkegiyan ni David si Abishai wey is langun he menge upisyal zin te, “Emun edtinguhà is anak ku te kedhimatey kedì, iyan pe be heini is kezuzumahi ni Saul? Belegaza niw en sikandin su NENGAZEN is midsugù kandin. ¹² Kela ke meehè ded te NENGAZEN is kelised ku guntaan ne ebelesan e zin te meupiya he ibales din te menge rawak kedì guntaan.”

¹³ Ne midlaus si David wey is menge sakup din he edhipanew. Ne edsunuzen sikandan ni Shimei, piru ziyè dà mebayà sikandin te kilid te vuvungan. Ne zutun te kedhipanew zin edrewakan din si David wey ebpenulengen din te watu wey tanà. ¹⁴ Uteu en neveley si David wey is menge sakup din, ne midhimeley sikandan hein nekeuma zan diyà te Wahig he Jordan.

Mibpekid-ahà si Hushai ki Absalom

¹⁵ Midhendiyà si Absalom te Jerusalem duma si Ahitofel wey is langun he keet-etawan te Israel.

¹⁶ Nekeuma zaan diyà si Hushai he Arkanhen,

he emigu ni David, ne midhendiyà sikandin te ki Absalom ne migkegiyan din te, “Mebmelugayad is untung te hadi! Mebmelugayad is untung te hadi!”
 17 Mid-insaan ni Absalom si Hushai te, “Hendei en is kebpekid-unung nu te emigu nu he si David? Maan is wazè ka meduma kandin?” 18 Midtavak si Hushai te, “Diyà a eduma te kenikew su iyan ka mibpili te NENGAZEN wey te tivuuk he keet-etawan te Israel he iyan egkehimu he hadi. 19 Gawas pa keniyàn, ne hentei pe be vuwa is ebpenilbiyan ku, kekenà, sikew is anak ni David? Mibpenilbi a te amey nu, ebpenilbi a zaan kenikew.”

Is Sambag ni Ahitofel ki Absalom

20 Migkegiyan ni Absalom si Ahitofel te, “Kegiya nu kun kedì ke hengkey is ebeelan ta.”
 21 Midtavak si Ahitofel te, “Hulizi nu is menge esawa te amey nu he intagak din he para edatur te turugan. Ne egketuenan te langun he menge Israilihanen he midhimu nu he mepauk is amey nu, ne tenged kayi utew ebpekevurut is menge sakup nu.” 22 Ne zutun mibaal zan te tulda he ebpeubpaan ki Absalom duen te atep te turugan, ne naahà te menge etew he midseled dutun sikandin he edhulid te menge esawa te amey zin.

23 Dutun he timpu mibpeming si Absalom te menge sambag ni Ahitofel, iring ded daan dutun is mibeelan ni David hein aney. Su is menge sambag ni Ahitofel in-iring daan te ziyà ebpuun te Megbevayà.

17

¹ Migkegiyan ni Ahitofel si Absalom te, “Tuguti a kenikew te kebpilì te 12,000 he etew he ibpepengehè ta ki David guntaan he kezukilemi.

² Edsurungen dey sikandin su neveley pa, ne meluya sikandin. Egketentanan sikandin ne ebpemelaguy is langun he minge sakup din. Iyan dà si David edhimetayan ku, ³ ne ibpelikù ku ziyà te kenikew is langun he minge sakup din he iring te kedlikù te esawa ziyà te tegiesawa kandin. Emun iyan dà si David edhimetayan, ne is minge sakup din ne kenè en ebpekidtebek.” ⁴ Heini he paagi meupiya para ki Absalom wey te langun he minge ebpemendumala te Israel.

⁵ Piru migkagi si Absalom te, “Ipehengkayi si Hushai he Arkanhen, wey ta mezineg ke hengkey is egkekagi zin.” ⁶ Ne hein nekeuma si Hushai ne midtudtul ni Absalom is minge sambag ni Ahitofel. Migkagi si Absalom te, “Ebeelan tew ve is migkagi zin? Emun kenà, ne hengkey ve is ebeelan tew?” ⁷ Migkegiyan ni Hushai si Absalom te, “Guntaan kenà meupiya heini is minge sambag ni Ahitofel. ⁸ Nekilala nu is amey nu wey is minge sakup din; mezesen sikandan wey zumezaas iring sikandan te bir he mid-egawan te minge anak din. Iring kenian is amey nu he nelayam te tebek, wey kenà sikandin ebpekiduma te minge sakup din ke edlipezeng. ⁹ Minsan buwa guntaan ne ziyè en sikandin te minge surung wey ke ziyè be te zuma he lugar. Emun diyà te egkehuna he kedtebek niw ebpematay is дума he minge sundaru nu, is ebpekezoneg kayi, ebpekekagi zan he nezaag is minge sundaru nu. ¹⁰ Ne minsan

is pinekemevurut he sundaru nu, he henduen te mevurut he erimaung, egkahandek. Su netueanan te langun he Israilihanen he is amey nu ne utew nelayam he ebpekidtebek wey mevurut is menge sakup din. ¹¹ Umbe, edsembagan ku sikew he vurvuruna nu is langun he Israilihanen puun te Dan pehendiyà te Beersheba, he iyan egkeiringan niw is pantad diyà te veyvey he utew mezakel. Ne iyan ke en pengulu kandan te kebpekidtebek. ¹² Ne ebpen-ahaan tew si David minsan hendei sikandin, ne edlingutan tew sikandin iring te zehemug he segugunà ebpekeeneb diyà te tanà; ne egkepatay tew sikandin wey is menge sakup din. ¹³ Emun ebpelaguy sikandin diyà te zuma he inged, ne edhiketan tew is menge verengbeng ne eguyuzen tew pehendiyà te wahig taman te egkerundus heini ne wazà dutun egkesamà he vatu!” ¹⁴ Migkagi si Absalom wey is langun he menge sinerigan te Israel te, “Meupiya pa is sambag ni Hushai he Arkanhen kenà is ki Ahitofel.” Meupiya is sambag ni Ahitofel, piru ketau te NENGAZEN he kenà ebpeminegen heini ni Absalom, su wey mezaat is egkepengkusan din.

¹⁵ Midtutdulan ni Hushai si Zadok wey si Abiatar kes menge memumuhat mehitenged te insambag ni Ahitofel ki Absalom wey te menge ebpemendumala te Israel, wey te kandin daan he insambag. ¹⁶ Ne migkegiyan din sikandan te, “Gègaani nu pesugui si David he kenà mebpetegak dutun te repasan te Jordan pehendiyà te sibsi-vayan te guntaan he kezukilemi, kekenà, ipelaus en sikandan iperapas dutun te wahig su wey kenè

dan mengegerà.”

¹⁷ Haazà he timpu, edtagad si Jonatan he anak ni Abiatar wey si Ahimaaz he anak ni Zadok diyà te En Rogel, su kenè dan egkesuat he egkaahà he egawas wey edseled dutun te Jerusalem. Duen sevaha he vahi he suluguen he ibpehendiyè dan su wey zan metueni ke hengkey is egkeulaula, ne edtutulen dan maan diyà te ki David. ¹⁸ Piru, zuen nekaahà kandan he sevaha he egkengkenakan, ne intazem din diyà te ki Absalom. Ne zutun migaanggaan dan med-awà dutun is dezuwa ne midhendiyè dan te valey te etew ziyà te Baruhim. Heini he etew ne zuen din kalut diyà te uvey te valey zin, ne zutun mebpenaug si Jonatan wey si Ahimaaz te kalut ne zutun dan med-eles. ¹⁹ Ne migkuwa haazà is esawa zutun te maama te zahun ne midtembunan din haazà is kalut ne migkegkagan din te trigu haazà is intambun dutun su emun duen dutun ebpekaahà ne egkeisip din is wazà dutun mid-eles. ²⁰ Hein nekeuma zutun is munge sakup ni Absalom te valey zutun te etew, ne mid-insaan dan haazà is esawa zin, “Neehè niw ve si Ahimaaz wey si Jonatan?” Midtavak haazà is esawa te, “Midlayun dan te wahig.” Mibpen-ehè dan sikandan piru wazè dan maahà, ne midlikù dan diyà te Jerusalem.

²¹ Hein wazè en dutun kes munge sakup ni Absalom, migawas si Jonatan wey si Ahimaaz dutun te kalut ne midhendiyè dan te ki David ne migkegiyan dan te, “Gaanggaan kew layun te wahig, su midsambag si Ahitofel he edhimetayan ka.” ²² Ne zutun midrapas si David wey is munge sakup din dutun te Wahig he Jordan, ne hein

megaan en egkepawà ne nemekelayun dan en is langun.

²³ Hein netuenan ni Ahitofel he wazà pezum-dumahi is menge sambag din, ne mid-untuzan din is asnu zin ne mid-uli diyà te inged din. Nemilin-bilin sikandin te pemilya zin ne midhiket sikandin pinaagi te kebitey. Diyè ded ileveng sikandin te midlevengan te amey zin.

²⁴ Nekeume en ensi David diyà te Mahanaim dutun te nekelayun en ensi Absalom wey is menge sakup din te Wahig he Jordan. ²⁵ Mibpili ni Absalom si Amasa he in-ilis din ki Joab he iyan peremandar te menge sundaru. Heini si Amasa ne anak ni Jeter he Ismailihanen. Iyan iney zin si Abigail, he anak ni Nahash, te suled te iney ni Joab he si Zeruya. ²⁶ Diyà megkampu si Absalom wey menge Israilihanen te Gilead.

²⁷ Hein nekeuma ensi David diyà te Mahanaim, ne migelgelawan sikandan ni Shobi he anak ni Nahash he Amunihanen, he ziyà ed-ubpà te Raba, ni Makir he anak ni Amiel, he tig-Lo Debar, wey ni Barzilai he Gilyadnen, he tig-Rogelim. ²⁸ Duen dan menge uwiten he hizegeey, malung, diniyun, trigu, barli, herina, midsandag he vegas te trigu, lisu he menge utanen, menge velatung, ²⁹ teneb, mentikilya, kerehidu, wey kisu. Imbegey zan heini ki David wey te menge sakup din, su netuenan dan he egkengevitil, egkengeveley, wey utew en sikandan egkemezahi zutun te kedhipanew zan.

18

Minatey si Absalom

¹ Midtigum ni David is menge sakup din te tig-1,000 wey tig-100, ne mibpili sikandin te peremandar he iyan ed-uwit kayi. ² Ne impehipanew zin sikandan he tetelu he vahin. Si Joab is egalen te sevaha, si Abishai he suled ni Joab is egalen te ikezuwa, ne si Itai he tig-Gat is egalen te iketelu. Migkegiyan sikandan ni Hadì David te, “Iyan ad eduma keniyu te kebpekidebek niw.” ³ Midtavak haazà is menge sakup din te, “Kenè en kinahanglan he meduma ke pa kenami. Su kenè key en idtetenged te menge kuntada ke ebpelaguy key, wey edhimetayan dan is ketengà kenami. Iyan dan pa gani egkesuatan he iyan ke zan mepatey kenà ke iyan heini is tig-10,000 kayi te kenami. Umbe meupiya pa ke kayi ke zà pelintetagak te inged ne peuwiti key zà ke hengkey is igketavang nu kenami.” ⁴ Midtavak si Hadì David te, “Ebeelan ku is meupiya para keniyu.” Ne midhitindeg si Hadì David dutun te uvey te pultahan te inged dutun te kemulu en edligawang is langun he menge sakup din he mibahin te tig-1,000 wey tig-100. ⁵ Midsugù ni Hadì David si Joab, si Abishai, wey si Itai te, “Tenged kedì ne kenè niw menuwa is betan-en he si Absalom.” Nezineg haazà te langun he grupu is migkagi ni David diyà te menge peremandar zin.

⁶ Midhipanew is menge sundaru ni David su ebpekidebek te menge sundaru te Israel, ne ziyà sikandan medtetebek te ketelunan te Efraim. ⁷ Nezaag is menge sundaru te Israel te menge sundaru ni David. Utew mezakel is nemematey, te haazà he andew 20,000 he etew. ⁸ Nekeeneb te tivuuk he ketelunan is kedtetebek, ne utew pa

mezakel is minatey tenged te kepiligru zutun te ketelunan kenà is nepatey pinaagi te ispada.

⁹ Timpu te tebek, nesenugung te minge sakup ni David si Absalom, ne mibpelaguy sikandin he ed-untud te kudà. Ne nenursuriyuk diyà te dizalem te merapung he minge subpang te kayu he ulayan, ne nekesanggat is ulu zin dutun te kayu. Ne midlaus en is kudè din mebbelelaguy, ne netagak en sikandin is nevivitey zutun te kayu.

¹⁰ Duen sevaha he sakup ni David he nekaahà dutun ne mibayaan din si Joab ne migkegiyan din te, “Neehè ku si Absalom is nevivitey zutun te kayu he ulayan.”

¹¹ Ne migkegiyan ni Joab sikandin te, “Hengkey? Neehè nu sikandin? Maan is wazè nu sikandin himetayi? Emun midhimetayan nu pezem ne edsuhulan ku sikew te sepulù he vuuk he selapì wey vakes he para te upisyal.”

¹² Midtavak haazà is etew te, “Minsan ebegayan a kenikew te 1,000 he selapì ne kenè ku edhimetayan is anak te hadi. Su nezindeg dey is migkagi te hadi kenikew, ki Abishai, wey ki Itai, he kenè niw menuwa is betan-en he si Absalom tenged kandin.”

¹³ Emun midhimetayan ku si Absalom ne egketueanan te hadi heini ne kenè e man kenikew edlevanan.”

¹⁴ Migkagi si Joab te, “Kenà a egkeuget kayi te kenikew!” Migkuwa si Joab te vangkew he tetelu ne mibayaan din si Absalom he nevivitey zutun te kayu he ulayan he uuyag pa. Ne mibpilak din diyà te kumeng si Absalom.

¹⁵ Ne is sepulù he tig-uwit te gumaan ni Joab, midlingutan dan si Absalom, ne midhimetayan dan.

¹⁶ Ne zutun impezaging ni Joab is budyung he tuus te ibpeengked en te edlayas is minge sundaru zin te

menge sundaru te Israel. ¹⁷ Migkuwa zan haaza is lawa ni Absalom ne in-ulug dan te vudsi ziyà te ketelunan ne midtembuan dan te mehabet he menge watu. Ne nemelaguy is langun he menge sundaru te Israel ne mibpemen-uli dan.

¹⁸ Hein uuyag pa si Absalom ne mibpehitindeg sikandin te munyumintu para te keugelingen din diyà te Sugud te Hadì, su wazè din anak he maama he ebpekeuwit te ngazan din. Migngezanan din haazà te “Munyumintu ni Absalom,” ne iyan ded heini ngazan din taman guntaan.

Midlalew si David te Kebpatey ni Absalom

¹⁹ Ne migkegiyan ni Ahimaaz he anak ni Zadok si Joab te, “Tuguti a te kedhendiyà te ki David su egkegiyen ku kandin is kedlibriya kandin te NENGAZEN puun te gehem te menge kuntada zin.”

²⁰ Migkagi si Joab te, “Kenà ka iyan edtudtul ziyà te hadì guntaan he andew. Egkehimu ka he ebpenudtul emun дума he andew kenà guntaan, tenged te nepatey is anak te hadì.” ²¹ Ne migkegiyan ni Joab is sevaha he etew he tig-Etiopia te, “Hipanew ke en, ne tudtuli nu si Hadì David te neehè nu.”

Ne hein nekepasad he edseludu haazà is etew ziyà te ki Joab, ne mibpelelaguy sikandin. ²² Mid-umanan kegiyi ni Ahimaaz si Joab te, “Minsan hengkey is egkeulaula, tuguti a he edsunud a zutun te etew he tig-Etiopia.”

Midtavak si Joab te, “Mama, maan is egkesuat ka he edhipanew? Wazà suhul nu kenian te kebpenudtul nu.” ²³ Migkagi sikandin te, “Minsan hengkey is egkeulaula ne edhipanew a.”

Ne migkegiyan ni Joab sikandin te, “Uya, genat ke en!” Ne

zutun mibpelelaguy si Ahimaaz, ne nememantek dà sikandin diyà te minge sugud te Jordan, ne nehunaan din pa haazà is etew he tig-Etiopia.

²⁴ Ne zutun te ebpimpinuu si David diyà te teliwazà duen te zezuwa he pultahan he ziyà te gawas wey ziyà te seled he vahin te verengbeng he zutun te inged. Nemenahik dutun te verengbeng is tighbantey te inged ne midhithitindeg dutun te atep te pultahan te inged. Ne mibpememantew sikandin, ne zuen neehè din he sevaha he etew he ebpelelaguy. ²⁵ Ne mibensagan din si David diyà te sihung he zuen etew he ebpekeuma. Migkagi si David te, “Emun sevaha zin dà ne duen din buwa uwiten he tudtul.” Ne hein ebpekeuvey-uvey en haazà is etew, ²⁶ ne zuen pa maan naahà dutun te tighbantey he sevaha he etew he ebpelelaguy. Migkulahì din is diyà te sihung te zuen pa sevaha he etew he ebpekeuma. Migkagi haazà is hadi te, “Duen din buwa uwiten he tudtul.” ²⁷ Migkagi haazà is ebantey te, “Is nehuna he ebpelelaguy ne henduen te si Ahimaaz he anak ni Zadok.” Migkagi haazà is hadi te, “Metazeng heeyan he etew. Duen din buwa meupiya he tudtul.” ²⁸ Hein nekeuma si Ahimaaz, migkemusta zin is hadi ne midluhud he tuus te kedtahud din. Ne migkagi sikandin te, “Ereg he edeligen is NENGAZEN he Megbevayè nu, Mahal he Hadi! Su iyan mibegey kenikew te kezeegan te minge etew he midsukul kenikew.” ²⁹ Mid-insà haazà is hadi te, “Kemuste en si Absalom? Wazè be sikandin memenu?” Midtavak si Ahimaaz te, “Hein impetawag a ni Joab he suluguen nu ne neehè ku he egkeguliyaved is minge etew piru wazè ku metueni ke hengkey

haazà.” ³⁰ Migkagi haazà is hadi te, “Kenian ke zà dèpa.” Ne midhitindeg sikandin diyà te kilid. ³¹ Netegtegaad ne nekeuma haazà is tig-Etiopia he egkagi te, “Mahal he Hadi, duen meupiya he tudtul ku. Su midluwas ka te NENGAZEN guntaan he andew te langun he midsukul kenikew.” ³² Mid-insaan sikandin te hadi te, “Kemuste en si Absalom? Wazè ded be sikandin memenu?” Midtavak haazà is etew te, “Berakat he is neulaula kandin ne iyan daan egkeulaula te langun he menge kuntada nu, Mahal he Hadi.”

³³ Migkerker si David. Ne nemenahik diyà te rugu zin diyà te divavew te pultahan dutun te inged ne midsinegew. Dutun te keb pemenahik din, ke sikandin te, “He Absalom, anak ku, iyan e en pezem nepatey he elili kenikew. He Absalom, anak ku!”

19

¹ Duen nenudtul ki Joab he edtulung edsinegew is hadi wey midlalew sikandin tenged ki Absalom. ² Hein nezineg heini te menge sundaru, ne neengked is kedlipeylipey zan te kezeegan dan, ne midlalew zan daan. ³ Mid-eles-eles dan mebpenlikù diyà te inged he Mahanaim, iring te menge sundaru he nengeeled su nemelaguy te tebek. ⁴ Mid-elasan ni David is dagwey zin ne nenderawit sikandin, “He Absalom, anak ku, anak ku!”

⁵ Ne midhendiyà si Joab te valey te hadi ne migkagi te, “Mibpeel-elezan nu guntaan he andew is menge sakup nu he midluwas kenikew wey te menge anak nu wey te menge esawa nu. ⁶ Ebmahalen nu is ebpekigkuntada kenikew, ne

egkuntedahan nu is nehizu kenikew. Impeehè nu he wazà pulus te minge upisyal nu wey minge sakup nu. Nesavut ku he meupiya pa ke iyan key nemematey ne si Absalom ne iyan uuyag. ⁷ Guntaan, gawas ka, ne peselemati nu is minge etew. Su emun kenè ka, ne ibpenangdù ku ziyà te etuvangan te NENGAZEN he wazà ebpelintetagak he eduma kenikew te guntaan he mezukilem. Ne iyan heini utew mezaat he egkeula-ula kenikew puun pa te nehuna taman guntaan.” ⁸ Ne midhitendeg si David ne ziyà mebpinuu te pultahan te inged. Hein netuenan heini te minge etew, ne miburunburun dan diyà te kandin.

Midlikù si David diyà te Jerusalem

Dutun he timpu, ne nemekepelaguy en he ed-uli is minge sundaru te Israel he minge sakup ni Absalom. ⁹ Necedlelawan dutun is tivuuk he Israel. Ke sikandan te, “Midluwas kiw ni Hadì David diyà te minge kuntada tew he minge Filistihanen, piru mibpelaguy sikandin kayi te nasyun tew tenged dà ki Absalom. ¹⁰ Guntaan, si Absalom is mibpili tew he iyan pengulu tew minatey ziyà te tebek. Deyzey ke ebpengehè kiw te paagi he ikepelikù tew si David te kedhadì?”

¹¹⁻¹² Hein netuenan ni Hadì David he iyan haazà pelanu zan, midsugù sikandin te ibpepenudtul ziyà te minge memumuhat he si Zadok wey si Abiatar, he egkagi te, “Kegiya niw heini ziyà te minge edumala te Juda: ‘Nezineg ku he egkesuatan te minge sakup niw he ibpelikù a he hadì. Maan is nehuziyan kew he ebpelikù kedì te kedhadì? Minge kezuzumahi ku sikiyu?’ ¹³ Ne kegiya niw

heini ki Amasa, ‘Tenged te lengesa ku en sikew, edhimuwen ku sikew he peremandar te menge sundaru ku he id-ilis ku ki Joab. Emun ke kenè ku heini ebeelan, ne berakat he purungi a siluti te Megbevayà.’ ”

¹⁴ Tenged kayi, neuwit ni David is langun he tig-Juda ne nesevaha is isip dan. Mibpeuwitan dan te lalag si David he egkagi te, “Sikew wey is langun he menge sakup nu, likù kew en kayi te kenami.”

¹⁵ Dutun te kedlikù eni David, midsinugung sikandin te menge tig-Juda ne ziyè dan medtigum te Gilgal su edtevangen dan si David te kedlayun dutun te Wahig he Jordan. ¹⁶ Sikan is tig-Benjamin he egngesanan ki Shimei he anak ni Gera, he ebpuun te Bahurim, migaanggaan medtupang su eduma te edsinugung ki David. ¹⁷ Duen miduma kandin he 1,000 he tig-Benjamin, apil zutun si Ziba he suluguen te pemilya ni Saul, дума is 15 he menge anak din he menge maama wey 20 he menge suluguen. Ne migaanggaan dan medhendiyà te Jordan is edtelavuk ki David. ¹⁸ Midugupan dan si David wey is pemilya zin he mekelayun dutun te wahig, ne midtuman dan is minsan hengkey he egkesuatan ni David.

Is Keupiya ni David ki Shimei

Hein edrapas en si David dutun te Wahig he Jordan, midluhud si Simei ziyà te kandin ¹⁹ he egkagi te, “Mahal he Hadì, peseyluwa a. Lipati nu en is kenà meupiya he neveelan ku kenikew hein kedawè nu ziyà te Jerusalem. ²⁰ Mid-angken ku he nekesalà a, Mahal he Hadì. Umbe mibpetelihuna

a te kedhendini te zuma he minge tribu ziyà te tribu ni Jose para te kedsinugung kenikew.”

²¹ Ne migkagi si Abishai he anak ni Zeruya te, “Kenè be engayan he edhimetayan si Shimei su midrewakan din is hadi he mibpili te NENGAZEN?”

²² Migkagi si David te, “Sikiyu is minge anak ni Zeruya, hengkey is lavet niw? Kenè niw supaka is ebeelan ku guntaan. Iyan e en hadi guntaan te Israel, ne wazà edhimetayan he etew te Israel guntaan he andew.” ²³ Umbe, migkegiyan ni David si Shimei te, “Ibpesarig ku he kenè ka edhimetayan.”

²⁴⁻²⁵ Midhendiyà daan si Mefiboshet he apù ni Saul su midtelavuk ki David. Diyà sikandin ebpuun te Jerusalem. Wazà melùlui is paa zin, wazè din mekiskisi is sumpè din, wey wazè din pa meilisi is ingkukumbalè din puun pa te kebpekeawà ni David diyà te Jerusalem taman te nekelikù he wazà memenu sikandin. Hein nekeume en sikandin diyà, ne mid-insaan sikandin ni David te, “Mefiboshet, maan is wazè ka meduma kedì?” ²⁶ Midtavak sikandin te, “Mahal he Hadi, netuenan nu he pigket a. Migkegiyan ku is suluguen ku he si Ziba he iandam din sikan is asnu ku para ed-untuzan ku te eduma kenikew. Piru mid-ekalan e zin. ²⁷ Ne mibaalvaal te lalag he kenè e kun eduma kenikew. Piru wazè ka meelesi su iring ka te velinsuguen te Megbevayà, umbe veeli nu is mid-isip nu he meupiya. ²⁸ Ereg pezem he ebpenhimetayan nu is minge kevuwazan te apù ku, piru siak is suluguen nu ne nehizuwan nu su impekaan nu zuma kenikew. Umbe kenà ad ereg he edhangyù

pa kenikew te pebur.” ²⁹ Migkegiyan sikandin ni David te, “Ereg en heeyan. Iyan en paagi ku is tengaa niw en ki Ziba is tanà ni Saul.” ³⁰ Migkagi si Mefiboshet diyà te hadi te, “Ivegey nu en kandin is langun. Su para kedì ne ingkelipey ku en is kebpekelikù nu he wazà mezaat he neulaula kenikew.”

Is Keupiya ni David he Impeehè Din ki Barzilai

³¹ Midhendiyà te ki David si Barzilai he tig-Gilead he ebpuun te Rogelim. Egkesuat daan sikandin he ed-ugup te kebpekelayun ni David te Jordan. ³² Megurang en si Barzilai; 80 en is penuigen din. Dekelà is ketigeyunan din, su iyan sikandin mibegey te menge kinehenglanan ni David hein kebpeke-ubpà ni David diyà te Mahanaim. ³³ Migkegiyan sikandin ni David te, “Duma ke en kedì te edlayun ne ziyè ka ubpà te Jerusalem. Iyan e en ed-elima kenikew ziyà.” ³⁴ Midtavak si Barzilai te, “Kenà ad ebpekezuma kenikew ziyà te Jerusalem su megurang e en. ³⁵ Su 80 en is penuigen ku, ne kenè ku en egketue-nan is meupiya wey kenà meupiya. Kenè ku en egkegezam is taam te egkeenen ku wey ed-inumen ku. Kenè ku en egkezineg is ebpemenganta. Egk-erikuran ke zà kedì, Mahal he Hadi. ³⁶ Deisey zà he tavang is kedhated ku kenikew, maan is utew iring keniyana is ibales nu? ³⁷ Ed-ulì e en, su emun ebpatay a ne ziyè e zed ebpatay te kediey he inged, he zutun daan ileveng is ginikanan ku. Heini zed is anak ku he si Kimhan ibpezuma ku kenikew para egkehimu he suluguen nu. Dumaha nu sikandin, Mahal he Hadi, ne iyan ke en metau

ke hengkey is meupiya he ebpeveelan nu kandin para kenikew.” ³⁸ Midtavak haazà is hadi te, “Ipezume en sikandin kedi ne ebeelan ku is minsan hengkey ziyà te kandin he meupiya para kenikew, ne ebeelan ku zaan is minsan hengkey he egkesuatan nu.” ³⁹ Ne zutun, migkepkepan ni David si Barzilai ne mibpenubtuvazan din. Ne human medrapas si David wey kes langun he menge sakup din dutun te Wahig he Jordan. Ne mid-uli en daan si Barzilai ziyà te ubpaan din. ⁴⁰ Hein nekerapas en si David, ne midhendiyà sikandin te Gilgal дума si Kimhan wey is langun he menge sundaru te Juda wey is ketengà te menge sundaru te Israel.

⁴¹ Ne midhendiyà te ki David is langun he menge etew te Israel ne midriklamu su maan is menge tig-Juda is nendesen te kebpeleyuna kandin wey te pemilya zin, wey is langun he menge sakup din. ⁴² Midtavak haazà is menge etew te Juda ziyà te Israel te, “Mibeelan dey heini tenged te is hadi ne kezuzumahi zey. Maan is egkengepauk kew? Duen be ingkepekaan kenami te hadi? Duen be nezawat dey he imbegey zin kenami? Wazà.” ⁴³ Midtavak haazà is menge etew te Israel te, “Sepulù key he tribu is diyà te Israel, umbe kesepulù edubliya is ketenged dey kenihan te hadi kenè kew. Maan is ibpekevavè key keniyu? Iyan key man nehuna he migkagi he ibpelikù tew is hadi tew?” Piru kenà egkelewanan is menge etew ziyà te Juda, ne mesakit is kinegihan te menge etew te Juda kenà is menge etew te Israel.

20

Nekidsukulà si Sheba ki David

¹ Duen sevaha he etew he tig-Benjamin he layun dà ebpen-ahà te samuk. Iyan ngazan din si Sheba, he anak ni Bicri. Impezaging din is budyung ne ebpengulahì te, “Menge tig-Israel, wazè tew lavet ki David he anak ni Jesse! Ebpen-ulì kiw is langun!” ² Ne zutun nemenggenat haazà is menge tig-Israel ne mid-ewaan dan si David ne miduma zan ki Sheba he anak ni Bicri. Piru is menge tig-Juda ne wazè dan ewai is hadi dan, ne midumahan dan puun dutun te Wahig he Jordan pehendiyà te Jerusalem.

³ Hein nekelikù si David diyà te turugan din diyà te Jerusalem, ne impaangey zin kes sepulù he esawa zin he intagak din he para ed-etiman duen te turugan, ne zuen ibpevantey zin kandan. Ne mibegayen din sikandan te kinahanglan dan, piru wazè din en hulizi sikandan. Ne zutun en sikandan med-ubpà he henduen be te menge valu taman te kebpatay zan.

⁴ Ne zutun migkegiyan dutun te hadi si Amasa te, “Umawa nu is langun he menge sundaru te Juda ne pehendiyè kew te kedì te iketelu he andew puun guntaan.” ⁵ Ne migenat si Amasa ne impetawag din is menge sundaru te Juda, piru wazà sikandin mekelikù dutun te andew he migkagi kandin te hadi. ⁶ Umbe, migkegiyan te hadi si Abishai te, “Tuwas pa he mezaat is ebeelan kenitew ni Sheba, kenà te mibeelan ni Absalom. Umbe guntaan, dumaha niw is menge sakup ku ne del-asa niw sikandin, su kela ke mekaagew

sikandin te vinerengbeng he menge inged ne egkepeleguyan kiw zin.”

⁷ Ne migenat si Abishai puun te Jerusalem su edleyasen din si Sheba he anak ni Bicri. Miduma zin si Joab wey is menge sakup din, is menge vantey ni David he menge Kiritnen wey menge Pilitnen, wey is langun he menge memevurut he menge sundaru. ⁸ Hein diyè dan en te zekelà he watu ziyà te Gibeon, neumahan sikandan ni Amasa. Ne si Joab, nekeyuyunipurmi ne edseseluniket te ispada. Hein egkeuvayan din en si Amasa, ne mid-el-elesan din hulevuta is ispada zin. ⁹ Migkegiyan din si Amasa te, “Egkemenumenu ke en suled?” Ne migewezan din te kewanan he velad din is sumpà ni Amasa, su uvag kun edhazek kandin. ¹⁰ Wazà mekevantey si Amasa he ziyà te givang ni Joab is ispada. Ne midsundang ni Joab diyà te getek ne nekeyakat diyà te tanà is bituka zin. Ne segugunà minatey sikandin, ne wazè en meumani mesundang ni Joab. Ne midlaus si Joab wey is suled din he si Abishai su edleyasen dan si Sheba. ¹¹ Duen sevaha he sakup ni Joab ne midhitindeg dutun te minatey he lawa ni Amasa, he migkagi ziyà te menge sakup ni Amasa te, “Emun diyè kew edapig te ki Joab wey ki David, ne sunud kew en ki Joab!” ¹² Nekesesavuk is lawa ni Amasa zutun te teliwazà te zalan he nepurung melupit te lengesa zin. Kada zuen ebayà dutun he ebpekaahà kandin ne edteren su ed-ahà. Ne hein netuenan heini te sakup ni Joab, ne miguyud din haazà is minatey he lawa ni Amasa puun dutun ne ziyè din uwita te vevesukà, ne midtembunan din te malung. ¹³ Hein naawè en dutun is lawa ni Amasa te dalan,

ne nemenlaus dan is langun he edsunud ki Joab he edlayas ki Sheba.

¹⁴ Midhendiyà si Sheba te langun he tribu te Israel su edtigumen din is langun he menge kezuzumahi zin. Ne midsunud kandin is menge kezuzumahi zin, ne mid-amur-amur zan diyà te Abel Bet Maaca. ¹⁵ Hein netuenan heini ni Joab wey te menge sakup din ne midhendiyè dan te Abel Bet Maaca ne midlingutan dan heini. Ne midtembuan dan te tanà is kilid te verengbeng su para mekeawè dan, ne midnenenayan dan te edrundus haazà is berengbeng.

¹⁶ Duen dutun sevaha he vahi he uluwanen te seled te inged ne migkulahi din is menge sakup ni Joab te, “Pemineg kew kedì! Kegiyi niw si Joab he medhendini te kedì su egkesuat a he ebpekidlalag kandin.” ¹⁷ Ne midhendiyà si Joab te kandin, ne mid-insà haazà is bahi te, “Iyan ke ve si Joab?” Midtavak si Joab te, “Uya.” Migkagi haazà is bahi te, “Datù, peminega nu is egkegiyen ku kenikew.” Midtavak si Joab te, “Ne en, ebpemineg a.” ¹⁸ Migkagi haazà is bahi te, “Duen sevaha he erubasa he egkagi te, ‘Emun egkesuatan niw he mehusey is menge samuk niw, ne vuyù kew te sambag diyà te inged he Abel.’” ¹⁹ Sevaha a te menge ebpenganduy he mebpedayun is kelinew te Israel. Piru sikew, maan is egkesuatan nu te edrundus is inged he gaked te NENGAZEN?” ²⁰ Midtavak si Joab te, “Kenè ku egkesuatan te edrundus is inged niw!” ²¹ Kenè dey heeyan tuyù. Iyan dey edleyasen si Sheba he anak ni Bicri he ebpuun diyà te vuvungan te Efraim. Iyan heini midsukul ki Hadì David. Iveyey niw sikandin

kenami ne ed-awè key kayi te inged niw.” Migkagi haazà is bahi te, “Idtimbang dey ziyà te kenikew is ulu zin puun kayi te seled te verengbeng.”

²² Ne zutun mibeyaan dutun te vahi is menge meginged dutun te inged ne midtutdulan din sikandan te planu zin. Mibpungelan dan te ulu si Sheba ne intimbag dan diyà te ki Joab. Ne segugunà impezaging ni Joab is budyung ne mid-awè dan dutun te inged duma is menge sakup din ne mid-ulì dan. Ne midlikù si Joab diyà te Jerusalem.

Is menge Upisyal ni David

²³ Iyan egalen te menge sundaru te tivuuk he Israel, si Joab. Is pengulu te tigbantey ki David he menge Kiritnen wey menge Pilitnen, iyan si Benaya he anak ni Jehoyada. ²⁴ Ne is edumala te menge uripen he ebpegesen te kedterebahu ne iyan si Adoniram. Ne iyan midserigan te menge libru te ginhedian din si Jehoshafat he anak ni Ahilud. ²⁵ Ne iyan sikritaryu te hadi si Sheva. Is lavew he memumuhat ne si Zadok wey si Abiatar. ²⁶ Ne si Ira he tig-Jair iyan keugelingen ni David he memumuhat.

21

Midhimetayan te Gibyunhen is menge Kevuwazan ni Saul

¹ Dutun te kedhadì ni David, duen nehitavù he vitil seled te tetelu he tuig. Ne zutun nekidlalag si David diyà te NENGAZEN. Migkagi is NENGAZEN te, “Neulaula is bitil tenged te kebpenhimetayi ni Saul wey te pemilya zin te menge Gibyunhen.”

² Kenà heini sikandan Israilihanen, kekenà, iyan heini kes nengesamà he menge uuyag te menge Amorihanen. Impenaad te menge Israilihanen he kenè dan en sikandan edhimetayan, piru si Saul, duen planu zin te kegeraa kandan tenged te igkeipeng din is Israel wey Juda.

Impetawag ni David is menge Gibyunhen ³ Ne mid-insaan din te, “Hengkey is ebeelan ku keniyu para meveyazi is salà ni Saul he mibeelan din keniyu? Kegiya niw kedì, para tuvazi en maan te NENGAZEN is keet-etawan din.” ⁴ Midtavak is menge Gibyunhen te, “Kenà egkeveyazan te selapì wey ke vulawan is kegkeepesi zey ki Saul wey te pemilya zin. Wazè dey zaan ketenged te kedhimatey te minsan hentei kayi te Israel gawas ke edtugutan key kenikew.” Mid-insà si David te, “Na, hengkey is egkesuatan niw he ebeelan ku para keniyu?” ⁵ Midtavak sikandan te, “Egkesuatan ni Saul he megerè key para wazè en egkesamà kenami kayi te Israel. ⁶ Umbe, ivegey niw kenami kes pitu he menge kevuwazan din he menge maama, su edhimetayan dey sikandan, ne kenà id-awà is menge lawa zan diyà te egkesevukan dan he uvey te ed-ezapan te NENGAZEN diyà te Gibeà, he inged ni Saul he mibpili te NENGAZEN he hadì,” midtavak haazà is hadì te, “Uya ibegey ku en sikandan keniyu.”

⁷ Piru si Mefiboshet is anak ni Jonatan he apù ni Saul ne wazà mulà iapil ni David te ebegey kandan, tenged te penangdù dan ki Jonatan diyà te etuvangan te NENGAZEN. ⁸ Iyan imbegey zin is dezuwa he anak ni Saul he si Armoni wey si Mefiboshet, he anak ni Rizpa he anak ni Aya.

Imbegey zaan ni David is lelima he anak ni Merab he menge maama. Si Merab anak ni Saul he esawa ni Adriel he anak ni Barzilai he tig-Mehola. ⁹ Imbegey sikandan ni David te menge Gibyunhen ne midhimetayan sikandan is pitu ziyà te vuvungan he uvey te inged he zutun ed-ezapa is NENGAZEN. Ne wazè en welenga zutun is menge minatey he lawa zan. Neulaula heini timpu te kebpuun ked-egani te barli.

¹⁰ Ne si Rizpa is anak ni Aya ne migkuwa te saku ne indempas din dutun te vatu su edhidhizegaan din. Su ebentayan din haazà is minatey he lawa para kenà mekaan te menge tagbis emun maandew, wey ke mezukilem ne kenà daan egkekaan te menge langgam diyà te ketelunan. Dutun sikandin med-ubpà puun pa te kebpuun te tingegani taman te ked-uzan.

¹¹ Hein netudtulan si David te mibeelan ni Rizpa he esawa ni Saul, ¹² midhendiyà sikandin te menge meginged te Jabesh Gilead ne mibuyù din is menge tulan ni Saul wey anak din he si Jonatan. (Hein nepatey en si Saul wey si Jonatan te kebpekidtebek dan te menge Filistihanen diyà te Gilboa, ne imbitey te menge Filistihanen is minatey he lawa zan diyà te pelasa te Bet Shan, ne wazà petueni te menge tig-Jabes Gilead he migkuwa zan haazà is minatey he lawa.) ¹³ Ne mid-uwit ni David haazà is menge tulan ni Saul wey ni Jonatan, inragkes din daan is menge tulan dutun te pitu he mibpehimetayan te menge Gibyunhen. ¹⁴ Ne impeleveng din heini te menge sakup din diyà te midlevengan te amey ni Saul he si Kish diyà te inged he Zela ziyà te Benjamin.

Netuman is langun he insugù ni David. Ne hein nepasad dutun, ne midtavak te Megbevayà is menge ked-ampù dan he meengked en is bitil zutun te nasyun dan.

*Is Tebek Kuntra te menge Filistihanen
(1 Cronica 20:4-8)*

¹⁵ Neuma is timpu zutun he mid-uman medtebek is menge Filistihanen wey menge Israilihanen. Ne zutun te kebpekidtebek ni David wey te menge sakup din, ne utew sikandin nelugat. ¹⁶ Si Ishbi Benob he Filistihanen, utew zekelà he etew; sevaha sikandin he menge kevuwazan te menge Ripanhen, ne egkesuatan din te edhimatey si David. Is purù te vangkew zin ne brunsi ne heepat he kilu is kevegat dutun, ne zuen daan begu he ispada zin. ¹⁷ Meupiya su nekeuma si Abishai he anak ni Zeruya is edtavang ki David, ne nepatey zin haazà is Filistihanen. Ne migkegiyan si David te menge sakup din te, “Kenè key en ebpeming ke ed-uman ka eduma kenami te kebpekidtebek. Iring ka te sulù te Israel, ne kenè key egkesuat he maawè ka.”

¹⁸ Nepasad dutun, mid-uman en maan medtebek is menge Filistihanen wey menge Israilihanen, ne ziyà heini meulaula te Gob. Kayi he tebek ne nepatey ni Sibecai he tig-Husha si Saf he sevaha te menge kevuwazan te menge Ripanhen. ¹⁹ Ne zuen pa sevaha he kedtebek dan diyà te Gob, ne nepatey ni Elhanan he anak ni Jaare Oregim, he tig-Betlehem, si Goliat he tig-Gat. Is bangkew zin ne mevegat wey mekepal.

²⁰ Mid-uman en maan medtebek is menge Filistihanen wey menge Israilihanen; diyà heini meulaula te Gat. Kayi he tebek, duen etew he utew zekelà, he tig-heenem is kemer te kada velad wey paa zin. Sevaha zaan sikandin he menge kevuwazan te menge Rafa. ²¹ Hein mid-undaunda zin is menge Israilihanen, ne mid-himetayan sikandin ni Jonatan he anak te suled ni David he si Simea.

²² Haazà is heepat he utew dezekelà he menge Filistihanen he menge kevuwazan te menge Rafa he tig-Gat. Mibpenhimetayan sikandan ni David wey te menge sakup din.

22

Is Kanta ni David te Kebpekezaag Din (Menge Salmo 18)

¹ Migkentahan ni David is NENGAZEN dutun te kedluwasa kandin te NENGAZEN diyà te gehem te menge kuntada zin wey ziyà te ki Saul. ²⁻³ Iyan heini kanta zin:

“Iyan ka, NENGAZEN, batu he endilungè ku; melig-en he elesè ku wey menluluwas.

Iring ka te elesà he watu, ne ed-eles a ziyà te kenikew.

Iyan ka kelasag ku wey mekegegehem he menluluwas.

Iyan ka eputè ku wey elesè ku.

Iyan ka midluwas kedì dutun te utew mesipala he menge etew.

⁴ Edeligen ka, NENGAZEN, su emun ebuyù a te tavang diyà te kenikew, ne edluwasen a kenikew zutun te menge kuntada ku.

- ⁵ Is kemetayen iring te vagel he edlingut kedì.
Is kezeetan iring te vendes te zalem he ed-anud kedì.
- ⁶ Is kemetayen, ne iring te pisi he ebpekevagkes kedì wey iring te litag dutun te ibayè ku.
- ⁷ Hein kedlised ku nengumew a kenikew, NENGAZEN.
Mibuyà a te tavang diyà te kenikew te Megbevayè ku,
ne zutun te valey nu mibpeming nu is ked-ampù ku.
- ⁸ Ne zutun ne midlinug, ne minsan is menge pundasyun te menge vuvungan ne neyunggat, tenged te kegkepauk nu, NENGAZEN.
- ⁹ Migawas is evel puun te izung nu,
ne ziyà te vèbè nu migawas is mekahandekhandek he hapuy wey egkeregreg he menge vaga.
- ¹⁰ Mibpuwasan nu is langit iring te kebpuwas te kurtina,
ne mibpenaug ka he ziyà med-untud te mekepal he gapun.
- ¹¹ Mid-untud ka te kirubin, ne utew heini megaan he edlayang he eduma te keramag.
- ¹² Midhimu nu is merusirem he tambun te peliguy nu. Mid-eles ka ziyà te mekepal he gapun.
- ¹³ Midpengilat diyà te etuvangan nu, wey midlepew is egkeregreg he menge vaga.
- ¹⁴ Is lageng nu NENGAZEN, te Ute Lavew he Megbevayà,
iring te rugung diyà te langit.
- ¹⁵ Mibpanè nu te kilat is menge kuntada nu,

ne nemekepelaguy zan he egkengeteranta.

16 Emun edawey ka wey utew ka egkepauk ne egkengemezahan is dagat ne egkaahà is tanà diyà te kinezizeleman kayi,

wey egkaahà is pundasyun te kelibutan.

17 Puun te langit midawat a kenikew, ne inggaun a kenikew puun te mezalem he wahig.

18 Midluwas a kenikew zutun te mekegegehem he menge kuntada ku he kenè ku egkesukulan.

19 Midsurung e zan hein egkeregenan a, piru mid-ugupan a kenikew, NENGAZEN.

20 Midlibri a kenikew te ebpekekaid pezem kedì su ingkesuat a kenikew.

21 Edtuvazan a kenikew su geina te metazeng a, wey wazè ku neveelan he salà.

22 Su edsunuzen ku is menge paagi nu, ne wazà a med-awà diyà te kenikew.

23 Edtumanen ku is langun he menge sugù nu, ne wazè ku supaka is menge sulunuzen he ibpesunud nu.

24 Netuenan nu he wazà igkesawey te keugelingen ku, ne edlikayan ku is kebaal te salà.

25 Edtuvazan a kenikew su neehè nu he metazeng a, ne wazè ku eveelan he ibpekesalà ku.

26 Metinumanen ka ziyà te menge etew he metinumanen daan.

Meupiya ka ziyà te menge etew he meupiya zaan.

27 Tinutuuwà is kebpekidepitè nu te menge etew he tinutuuwà daan is kebpekidepitè dan kenikew,

ne metau ka zaan he bales te menge lalung.

28 Uya, edlibriyen nu is kenà minge mepelevawen,
piru ibpekevavè nu mulà is minge etew he mepelévawen.

29 NENGAZEN, iyan ka kerayag ku.

Emun merusirem, ne iyan ka sulù ku.

30 Tened te kedtavang nu, ebpekehimu a he edsurung te minge sundaru,
ne egpekehimu a zaan he ebpemenahik te verengbeng he nekeliguy te inged.

31 Is kenikew he paagi, Megbevayà, ne wazè din sayep.

Is lalag nu egkeserigan.

Iring ka te kelasag te langun he ebuyù kenikew te pengalang.

32 Iyan ke zà, NENGAZEN, kes Megbevayà;
kes endilungè dey he watu.

33 Iyan ka ebegey kedì te zesen wey ebantey kedì diyà te ibayè ku.

34 Edlig-enan nu is minge paa ku iring te paa te selazeng,
para mezesen a he ebpenekzeg diyà te metikang he minge lugar.

35 Ebpenuruen a kenikew te kebpekidtebek, iring te kedhingat te mevisekeg he panà.

36 Mibpengelangan a kenikew iring te kelasag, umbe neluwas a.
Ne nevantug a pinaagi te kedtevangi nu kedì.

37 Ebegayan a kenikew te meupiya he ibayà, umbe wazà mekezugkilas is minge paa ku.

38 Midal-as ku is minge kuntada ku ne nezaag ku sikandan.

Ne human a medlikù hein nengezaag ku en sikan-
dan.

39 Midezeetan ku sikandan ne nengepiley zan diyà
te uvey te nehitindegan ku,
ne kenè en sikandan ebpekeenew.

40 Mibegayan a kenikew, NENGAZEN, te zesen te
kebpekidtebek
ne nengezaag ku is menge kuntada ku.

41 Mibpepeleguyan a kenikew te menge kuntada
ku
ne midezeetan ku sikandan.

42 Mibuyù dan te tavang,
piru wazà midlibri kandan.
Nengumew-umew zan kenikew,
piru wazè nu sikandan tevaka.

43 Midruntek ku sikandan taman te neiring en
sikandan te eliyavuk.
Midtekutakan ku sikandan he iring te tunaan diyà
te menge zalan.

44 Midluwas a kenikew, NENGAZEN, te ebpekid-
sukulà kedì he menge etew.

Midhimu a kenikew he pengulu te menge nasyun.
Is menge lumelengyawà, ne ebpenilbi kedì.

45 Midluhud sikandan kedì tenged te kegkahan-
dek dan, ne midtuman dan is sugù ku.

46 Neewaan sikandan te kevrut,
umbe migawas dan puun te mid-elesan dan he
ebpengerkeren te kegkahandek.

47 Uuyag ka, NENGAZEN!
Edeligen ka is endilungè ku he watu.
Ibayew ku sikew tenged te iyan ka Megbevayà he
menluluwas ku.

48 Ebelesan nu is menge kuntada ku,

ne ibpesakup nu kedì is minge nasyun.

⁴⁹ Midluwas a kenikew zutun te utew minge mesi-
pala he minge kuntada ku,
ne ibpezaag nu kedì sikandan.

⁵⁰ Umbe, ibpezalig ku sikew ziyà te minge nasyun.
Egkentahan ku sikew te minge kedalig.

⁵¹ Is pinilì nu he hadi ebegayan nu te zekelà he
minge kezeegan.

Mahal nu si David wey is minge kevuwazan din te
wazà pidtemanan.”

23

Is Kebpeneltelaan ni David

¹ Si David he anak ni Jesse, midhimu he mevan-
tug te Utew Lavew he Megbevayà. Mibpili
sikandin te Megbevayà ni Jacob he mehimu he
hadi. Wey ebaal sikandin te minge kentahan te
Israel. Iyan heini impeneltelaan din:

² “Ebpekidlalag is Mulin-ulin te NENGAZEN pinaagi
kedì;

is minge lalag din, ne kayi te vèbè ku.

³ Is Megbevayà he iyan is endilungà he watu te
Israel, migkagi sikandin kedì, ke sikandin
te,

‘Is etew he metazeng is kedumala wey zuen din
kegkehandek te Megbevayà,

⁴ iring sikandin te anlag te andew he edsilà ke
meselem he wazà gapun,

he ebpekepesinew te neuzanan he minge sagbet!’

⁵ Iyan heeyan ked-ahà te Megbevayà te pemilya
ku,

su midhimu sikandin kayi te kedì te kebpekid-
uyun he wazà pidtemanan.

Heini he kebpekid-uyun, ne kenè en egkevelvele-
 wanan ne kenè en daan egkeilisan.
 Umbe egkeperateng ku he lelayun a edluwasa te
 Megbevayà,
 wey ibegey zin kedì is langun he egkesuatan ku.
 6-7 Piru is minge lalung he minge etew ne iring
 sikandan te zugiyen he minge rasang he
 idtimbang.
 Kenà belad is ibpunpun duen su zuen egemiten he
 igkerit,
 ne edtutungen heini ziyà te lugar he zutun heini
 burvuruna.”

*Is minge Mevurut he minge Sakup ni David
 (1 Cronica 11:10-41)*

⁸ Iyan heini minge sakup ni David he minge
 mevurut:

Si Josheb Bashebet he tig-Takemon, he iyan
 kes edhuna zuen te tetelu he minge mevurut he
 sakup ni David. Te senge sangkè dà ne nekepatay
 sikandin te 800 he etew pinaagi te vangkew zin.

⁹ Ne iyan sunud kandin si Eleazar he anak ni
 Dodai he kevuwazan ni Ahoa, he sevaha zuen
 te tetelu he utew minge mevurut he sakup ni
 David. Sevaha sikandin te zuma ni David he
 nemenhingat te tebek te minge Filistihanen he
 ziyà medtigum te Pas Damin para te kebpekidte-
 bek. Nemelaguy is minge Israilihanen, ¹⁰ piru
 sikandin, ne wazà mulà su kemulu zin en ebpen-
 himetayi is minge Filistihanen, taman te nelugat
 en is belad din ne kenè en ebpekekeyew te is-
 pada. Impezaag sikandan te NENGAZEN te haazè
 dà he andew. Kes mibpemelaguy he minge Is-
 railihanen nemenlikù dan diyà te ki Eleazar su

ebpenguwaan dan kes menge gumaan te menge mibpematey.

¹¹ Ne sunud si Shama he anak ni Agee he tig-Harar. Sevaha he andew zutun, midtigum diyà te Lehi is menge Filistihanen, ne midsurung dan is menge Israilihanen diyà te vevesukà he neeneb te velatung. Nemelaguy is menge Israilihanen, ¹² iyan dà wazà mebpelaguy si Shama dutun te teliwazà te vevesukà su mibentayan din heini. Mibpenhimetayan din is menge Filistihanen ne imbpezaag sikandan te NENGAZEN te haazà he andew.

¹³ Sevaha zutun he timpu te ting-egani, midhendiyà te ki David haazà is tetelu he sakup din duen te surung te Adulam. Heini is tetelu he etew, ne zuma heini sikandan te 30 he mevurut he menge sakup ni David. Dutun he timpu ne ziyà megkampu haazà is menge Filistihanen te Sugud he Refaim ¹⁴ ne naagew zan is Betlehem. Hein diyè pa si David te melig-en he elesà, ¹⁵ utew sikandin ebpekeinum. Migkagi sikandin te, “Deyzey pezem ke zuen egkuwa te wahig he egkeinum ku ziyà te kalut he uvey te gemawan te Betlehem.” ¹⁶ Umbe, mid-eles-eles midseled haazà is tetelu he mevurut he menge etew zuen te kampu te menge Filistihanen, ne migkuwa zan te wahig dutun te kalut he uvey te gemawan te Betlehem, ne mid-uwit dan diyà te ki David. Piru wazà inuma haazà ni David; kekenà, in-itis din haazà su pemuhat din para te NENGAZEN. ¹⁷ Migkagi sikandin te, “NENGAZEN, kenè ku heini ed-inumen tenged te iring heini kemahal te lengesa te menge etew he impedserakan dan is untung dan te kegkuwa kayi.” Umbe

wazà iyan med-inum si David.

Iyan haazà mibeelan dutun te tetelu he mevurut he menge sakup ni David.

¹⁸ Si Abishai he suled ni Joab, he anak ni Zeruya iyan pengulu zutun te 30 he mevurut he menge sakup ni David. Nekepatey sikandin te 300 he menge Filistihanen pinaagi te vangkew zin. Umbe, nehimu he nevantug sikandin he iring duen te tetelu he mevurut he menge etew. ¹⁹ Ne tenged te iyan sikandin nevantug he zuma zutun te 30, iyan sikandin nehimu he peremandar zan, piru kenà sikandin ragkes duen te tetelu he menge mevurut.

²⁰ Duen pa sevaha he mevurut he etew he egezezanan ki Benaya. Tig-Kabzeel sikandin, ne iyan amey zin si Jehoyada. Mibaal sikandin te wazè din iring he menge vaal, ragkes en is kedhimetayi zin te zezuwa he ventugan he sundaru te Moab. Duen timpu he zutun mibpendal-as din is erimaung minsan ebpenggiyew wey melandeg, ne mibpeneugan din duen te budsì ne midhimetayan din haazà is erimaung. ²¹ Sevaha pa maan dutun he timpu, midhimetayan din is utew zekelà he etew he Ehiptohanen. Ne is gumaan dutun te Ehiptohanen ne vangkew, piru is kandin mulà he gumaan ne kayu zà he idlagkut. Ne midagew zin haazà is bangkew zutun te Ehiptohanen ne iyan ded heini inhimatey zin kandin. ²² Iyan haazà menge vaal he mibeelan ni Benaya he anak ni Jehoyada. Nehimu sikandin he ventugan iring duen te tetelu he mevurut he menge etew, ²³ piru kenè din дума sikandan. Ne tenged te iyan sikandin pinekeventugan duen te menge zuma zin

he 30, midhimu sikandin ni David he pengulu te menge vantey.

²⁴ Iyan heini menge sakup te 30 he menge mevurut he menge etew:

Si Asahel he suled ni Joab;

si Elhanan he anak ni Dodo he tig-Betlehem;

²⁵ si Shama wey si Elika he menge tig-Harod;

²⁶ si Helez he tig-Palti;

si Ira he anak ni Ikesh he tig-Tekoa;

²⁷ si Abiezer he tig-Anatot;

si Mebunai he tig-Husha;

²⁸ si Zalmon he tig-Ahoa;

si Maharai he tig-Netofa;

²⁹ si Heleb he anak ni Baanah he tig-Netofa;

si Itai he anak ni Ribai he tig-Gibea, he sakup te Benjamin;

³⁰ si Benaya he tig-Piraton;

si Hidai he ziyà ed-ubpà te uvey te menge zal-ug te Gaas;

³¹ si Abi Albon he tig-Araba;

si Azmavet he tig-Bahurim;

³² Si Eliaba he tig-Shaalbon;

is menge anak ni Jashen;

³³ si Jonatan he anak ni Shama he tig-Harar;

si Ahiam he anak ni Sharar he tig-Harar;

³⁴ si Eliflet he anak ni Ahasbai he tig-Maaca;

si EIAM he anak ni Ahitofel he tig-Gilo;

³⁵ si Hezro he tig-Carmel;

si Paarai he tig-Arba;

³⁶ si Igal he anak ni Natan he tig-Zoba;

he anak ni Hagadi;

³⁷ Si Zelek he tig-Ammon;

si Naharai he tig-Beerot, he iyan tig-uwit te gumaan ni Joab he anak ni Zeruya;
³⁸ si Ira wey si Gareb he menge tig-Jatir;
³⁹ wey si Uria he Hitihanen. 37 is langun.

24

Midsinsus ni David is menge Sundaru Zin (1 Cronica 21:1-27)

¹ Neuman mepauk is NENGAZEN te menge Israil-ihanen ne impevaal zin si David te ebpekezezaat kandan. Migkegiyan din si David te, “Bilanga nu is menge keet-etawan te Israel wey Juda.” ² Ne migkegiyan ni Hadi David si Joab wey is menge peremandar te menge sundaru te, “Beyai niw is langun he tribu te Israel, puun te Dan taman te Beersheba ne ipenlista niw is menge etew, wey ku metueni ke pira sikandan langun.” ³ Piru midtavak ni Joab is hadi te, “Berakat he ipemezakel te NENGAZEN he Megbevayè nu is keet-etawan nu te 100 he takep, ne meehè nu pezem heini. Piru Mahal he Hadi, maan is egkesuatan nu te ebaal heini?” ⁴ Piru iyan netuman is ki David dutun, umbe migenat si Joab wey is menge upisyal te menge sundaru te kedpenlista te menge keet-etawan te Israel. ⁵ Nekerapas dan te Wahig he Jordan ne ziyè dan mebpuun mebpenlista te Aroer, he zapit te edsenlepan te inged he kilid te zal-ug. Puun dutun mibpehendiyè dan te Gad ne midlaus dan diyà te Jazer. ⁶ Midhendiyè dan daan te Gilead, diyà te Tatim Hodshi, diyà te Dan Jaan, ne mid-eneb-eneb dan en pehendiyà te Sidon. ⁷ Ne midhendiyè dan te vinerengbeng

he inged he Tyre wey langun he menge inged te menge Hitihanen wey Canaanhen. Ne te neipus dan dutun, midhendiyè dan te Beersheba, he zapit te zivavà te Juda. ⁸ Neliguy zan is tivuuk he nasyun seled te siyam he vulan wey 20 he andew, ne hein nepasad ne midlikù dan diyà te Jerusalem.

⁹ Ne midtudtul ni Joab diyà te ki Hadì David is kezakel te menge maama he ebpekesukul en te kebpekidtebek: 800,000 is diyà te Israel ne 500,000 is diyà te Juda. ¹⁰ Ne mibmezaat is gehinawa ni David hein nepasad is kedsinsusa zin te menge etew. Ne migkegiyan din is NENGAZEN te, “Neke-salà a kayi te mibeelan ku. Umbe ebpehizuhizu a kenikew, NENGAZEN, he peseyluwa a kenikew is suluguen nu te salè ku, su kelelalung is mibeelan ku.”

¹¹ Sunud he meselem dutun te wazè pa med-enew si David, migkegiyan te NENGAZEN si Gad he menenagnà ni David te, ¹² “Hendiyè ka te ki David ne ipepilì nu sikandin ke hendei zapit kayi te tetelu is egkesuatan din he idsilut ku kandin.”

¹³ Ne midhendiyà si Gad te ki David ne migkegiyan din sikandin te, “Hendei kayi is egkesuatan nu: Tetelu he tuig he vitil diyan te nasyun nu, tetelu he vulan is kebpepelaguy niw su edleyasen kew te kuntada niw, wey ke tetelu he andew is sunudsunud he zuen ebpematey kayi te nasyun nu? Is-isipa nu purungi heeyan, ne kegiya nu kedì ke hengkey is idtavak ku te NENGAZEN he iyan midsugù kedì.”

¹⁴ Midtavak si David diyà te ki Gad te, “Egk-eregenan a utew te kebpiì. Deyzey pa ke iyan

en is NENGAZEN edsilut kenami te menge etew, su hihizuwen is NENGAZEN.”

¹⁵ Umbe, mibpaagi is NENGAZEN te kezeetan diyà te Israel puun dutun he meselem taman te neuma is andew he migkagi zin. Ne 70,000 he menge Israilihanen is mibpimatey puun te Dan taman te Beersheba. ¹⁶ Hein naandam en is belinsuguen he edezaat pezem te Jerusalem, ne nahalin is isip te NENGAZEN te kedsilut te menge etew. Ne zutun migkegiyan din haazà is belinsuguen he edsilut dutun te menge etew te, “Hustu en! Kenè nu en sikandan siluti.” Haazà he timpu diyà haazà is belinsuguen te NENGAZEN te gunasà ni Arauna he Jebusihanen.

Mibaal si David te Pemuhatà

¹⁷ Hein naahà ni David haazà is belinsuguen he mibpenhimatey te menge etew, migkegiyan din is NENGAZEN te, “Iyan a nekesalà. Heini is menge etew ne wazè dan peleng iring te menge kerehidu. Wazè dan mekevaal te salà. Iyan e en wey is pemilya ku siluti.”

¹⁸ Haazà he andew midhendiyà si Gad te ki David ne migkegiyan din te, “Tekezeg ka zutun te gunasà ni Arauna he Jebusihanen ne vaal ka zutun te pemuhatà para te NENGAZEN.” ¹⁹ Ne midtekezeg si David sumalà is insugù kandin te NENGAZEN pinaagi ki Gad. ²⁰ Hein naahà ni Arauna si David wey menge sakup din he ebpel-ingguma, ne migawas sikandin ne midluhud diyà te etuvangan ni David he tuus te midtahud din sikandin. ²¹ Migkagi si Arauna te, “Mahal he Hadì,

maan is kayi ka?” Midtavak si David te, “Midhengkayi a su ebpemesahan ku heini is gunasè nu su ebaal a kayi te pemuhatà para te NENGAZEN, wey meengked en is kedlimasa te menge etew.”

²² Migkagi si Arauna te, “Kuwaa nu en wey nu ipemuhat te Megbevayà is minsan hengkey he kebayè nu, Mahal he Hadì. Heini zed is baka para te ibpemuhat nu he pemuhat he edtutungen, wey heini zed is eyugu zan wey menge kangga he egemiten te egunas he para idtavun. ²³ Mahal he Hadì, ibegey ku heini langun kenikew. Deyzey ke dewata te NENGAZEN he Megbevayè nu is pemuhat nu.”

²⁴ Piru midtavak ni David, ke sikandin te, “Kenè ku heini egkuwaan he wazà bayad; ebeyazan ku sikew. Kenè ku ibpemuhat diyà te NENGAZEN he Megbevayè ku is menge pemuhat he edtutungen he wazè din bali kayi te kedì.” Umbe mibpemasa ni David haazà is gunasà wey menge vaka te 50 he vuuk he pelata. ²⁵ Ne mibaal sikandin dutun te pemuhatà he para te NENGAZEN ne nemuhat sikandin te menge pemuhat he edtutungen wey menge pemuhat he para te meupiya he kedepità. Midtavak te NENGAZEN is menge hangyù ni David para te Israel, ne neengked is limas.

Is Lalag te Megbevayà Old Testament only in Manobo, Western Bukidnon

copyright © 2013 Wycliffe Bible Translators, Inc.

Language: Manobo, Western Bukidnon

Translation by: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Old Testament only

in Manobo, Western Bukidnon

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files
dated 29 Jan 2022
c675b304-11fc-57a1-addc-5753dc22388c